

ASO GAFUA, 01 MATI 2021

Na toe faaauau Taualumaga a le Fono Aoao Faitulafono i le itula e 6:10 i le afiafi.

Na toe faaauau felafolafoaiga ma Tali a le Malo i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

FOFOGA FETALAI: Ou te faasilasila atu ua toe amatalia Taualumaga a le Fono Aoao Faitulafono.

Malo le onosai mai malo foi le tauatai ina ia faataunuu le tatou galuega. E faataatiaese le Galuega a le Fono Aoao i le aoauli ua sola o saunoa le Minisita ia Afamasaga, le Afioga ia Toeolesulusulu, Minisita mo Fesootaiga, Faamatalaga ma Fesootaiga Vavave Faaneionapo. E i ai le manatu, tulai maia e faaauau le saunoaga.

Afioga Hon AFAMASAGA LEPUAI RICO TUPAI (Minisita mo Fesootaiga, Faamatalaga ma Fesootaiga Vavave Faaneionapo): Ua faamalo faafetai i lau Afioga i le Fofoga Fetalai mo lenei avanoa taua. Ou te manatu o lea ua maea ona tafatu seuga o outou sa i auvai, ua matu foi i fau outou faiva a manaia le mamalu o le Palemene, a o la outou toe lalafo foi o foe o le savili i le toului ai o le taulaumea i lenei Paeaiga Lona XVI. O lea foi ua gase atu i Fagalele peau faailo mala o le vasa, a ua tepa taumeasina ai le aso ma lenei taeao liugalua i le alofa ma le agalelei o le Atua. E ui lava ina ua le atoa le auvaa o lou sa lau Afioga i le Fofoga Fetalai i le tini ai o le sa o Samoa i lenei tausaga i lana Paeaiga, ae tatou te faafetai i le Atua ua na o le Tofa ia Pau Sefo Pau ma le Afioga ia Vaafusuaga Toleafoa Ken Poutoa ua amia. A o lo o faapena ona atoa pea le 50 o sui usufono o le sa e faapena ona faaatea le tatou folauga i fanua aua Samoa ma lenei Paeaiga.

Ia tau ia ina ia faamafanafana le agaga o le Atua i faletua ma nofo a alo, aemaise lava i le faletua ia Vaelaa ma si ona alo, aemaise foi le itumalo faapalota o Lefaga ma Faleaseela, o le paia aua le Aiga Sa Tuala ma le Aiga Taulagi ia te oe le Matua, a o le mamalu foi ia te oe le tootoo, aua Maauga, le mamalu i le Falefa ma le Faleaana e tausivaatele ia te oe le Tuisavailuu.

Ae ou te le i utuina le mataiva o le vaigagana o le Tuiaana na momoo i ai le tamaitai o le Alataua, ia tau ia ina ou lalagi sugalu e momoli ai mea i feetaga o Tupu, aua le paia o Samoa o le aomamala i le faasuaga

o ao ma le atufolasa, mai lava i matafanua i malaetele ma malaefonoa seia paia eleele o le Alataua sa faapena ona saili ai manu o Malo.

Ou te manatu e faatulou atu i le paia o le Maota nei, ou te le toe tauululumatalauina le Maota o Samoa i ou paia, o ou sa ma ou faiga. O outou lava o pou na faia mai le fuifui, lupe na faia mai le fuifui e pou ai le Maota o Samoa i Tiafau nei. O le paia aua Aiga ma latou Tama, Aiga o Nofo, Aiga o Ee, Aiga o Papa, Aiga na Tafaifa, e tausivaatele e le mamalu i la oulua usoga Tumua ma Pule, tainane Aiga i le Tai ma le Vaa o Fonoti.

Ou te manatu foi e tatau ona faatulou i o taotu aiga i Tutuila ma Manua, i le afio o lau Afioga i le Kovana Sili, lau Afioga Mauga Lemanu Palepoi. Tainane lau Afioga i le Kovana Lutena lau Afioga Eleasaro, le mamalu aua le Maota o Sui ma le Maota maualuga. Ia a o le paia foi aua Sua ma le Vaifanua, o Fofu ma Aitulagi Saole ma Saleaamua ma le Launiu na Saelua. Le mamalu i le nofo a too, ma le Laau na Amotasi. O mamalu sauoo na o samoa, tulou, tulou, tulouna lava. O le toe lauga leni a le Kapeneta ona saunoa lea ma tanoa faalele le Afioga i le Palemia e tau ai sa matou tali atu aua leni Tala o le Tupe 2020/2021.

Ona ou manatu lea o le a ou le alulua, ae tau ina ou faatalofa atu i le tapuaiga a lau Afioga i Le Ao Mamalu o le Malo, lau Afioga Tuimalealiifano Vaaletoa Sualauvi ma lau Masiifo. E faatalofa atu foi ma ofo alofa atu i lau Afioga i le Sui o le Fono a Sui Tofia, lau Afioga Le Mamea Ropati Mualia ma lou faletua.

E faatalofa atu i lau Afioga i le Fofoga Fetalai ma le mamalu o le Palemene. E faatalofa foi i le tapuaiga malu aua le Afioga i le Faamasino Sili ma le Pusetene ma le mamalu o le Faamasinoga. E faatalofa atu i lau Afioga i le Taitai o le Malo, le mamalu o le Kapeneta ma le mamalu o Minisita Lagolago.

E faatalofa foi i le paia o le tapuaiga a le Maota nei, aua a outou afioga i Ofisa Sili o Pulega o Matagaluga, o outou e lagolago aemaise i aufaigaluga uma a le Malo ua aofia ma potopoto i le aso.

A o lau faatalofa faapitoa i si ou lala maoti, o le lala o Fesootaiga ma ana paaga ua matauina o lea ua faavaatutui le Maota nei i le afio mai tala mai o o aao o lo outou paia aua leni aso ma le faamoemoe.

Ia si ou itumalo e o Aana Alofi Nu.3, o le a liliu nei ia Aana Alofi Nu.4, o le a ou le apoina i iu ou paia aua le mamalu o lau tapuaiga. Amuli ona faalauvae lea o le upega o tupu, ou liliu ane aua ou sa ma ou faiga, o ou tu ao ma tu tafaitoa, a o faapena ona usi faavaa o savili le faafofoga a le Maota nei, ia tapuai maia se i ou liliu ane e lalafo foe o le savili aua o lele ua taoto le aupeau. Alo i lau tapuaiga ma lau tatalo leleoa Aana Alofi, se i e faafofoga i le ta tautua i le Malo i leni 5 tausaga ua maea. E 31 tausaga e le i oo mai le tofi Minisita i le ta itumalo. Faafetai. Ae pe sa faapefea ona faatino lo ta tofi na tofia ai e lo ta itumalo i le tofiga o le Minisita o Fesootaiga ma Faamatalaga Tekonolosi. Lea a alaga e le tasi o tulafale o le faleupolu o le tatou itumalo Ili Olotutu fai mai, o le Minisita o Fesootaiga, Tekonolosi,

Cable ma Uaea i lalo o le Sami, Facebook ma Initaneti, e feiloai ma fefaloai ai aiga.

Lau Afioga i le Fofoga Fetalai ma le mamalu o le Maota, a o le faafofogaaga a Samoa, afai sa tatou faafofoga ma matau i lauga a Minisita o le Kapeneta i le tele ma le anoanoai o nei atinae na faatino i lenei Paeaiga, o le mea moni, ua tele le suiga o Samoa. O le itu tau tekonoosi lava ia, ua matua ese le maualuga o le tulaga ua i ai nei. E i ai se lagona ina ia tatou talisapaia appreciate le lelei ua i ai nei le atinae o fesootaiga, na o sina minute lava tatou te toe tepa tasi ai i tua ma manatua aso ua mavae ma le tulaga na i ai. E le mafai ona galo e le mamalu o le Maota le taimi o telefoni vili, e tasi pe na o se 2 ni telefoni i totonu o se nuu e auai i ai aiga. Afai la o le tou aiga e ona le telefoni, ia e te faalogologo uma lava i mataupu a si outou nuu lea e auai mai. Vili iinei pe vili i fafo. A o na foi aso, e te vili muamua i le fale telefoni i le exchange, ona fai mai lea o le teine, e totogi pe totogi i o, pay pe collect? Sa fai foi le telefoni a le Ofisa o le Falemeli ma le maketi tuai sa i Tauese e taulai i ai pasi i lenei vaitaimi. A fia vili la i Niu Sila po o Ausetalia, ia ona e agai mai lea i ai po o fea lava le mamao e te sau ai. E tau le lagona au mataupu i le tele o isi mataupu ia e fai i ou autafa, ae tasi lava le taulaiga, o sina tupe mo le faalavelave.

E manatua vave lava i lou manatu se tasi o tamalii o le tatou atunuu sa faigaluega i le tatou Ofisa i Peleseuma i le 1990. Ua vili mai si toeaina e asi foi le loomatua ma tamaiti ona vili foi lea tali i le fale telefoni, se i tuu atu lava au i le 735 faamolemole. Fai mai le teine, pay pe collect, fai mai le toeaina, collect. Ia tali mai le olomatua, e atoa lava le 10 minute o fai le la talanoaga faaleulugalii ua leva ona valavala. Ia, faapena foi lea ona fesili ma tamaiti. A o le aso tonu lava lea i le aoauli sa taaalo ai le au a tatou ma Fiti i le Apia Park i le malae tutuu. O ai na malo o tatou ma Fiti analeila? Ae fai mai le olomatua, ae, ia ua iloa foi au ou te fiafia i na mea o lakapi. Ou te le iloa. Ua te i lava le toeaina i le oso mai o le tagata i totonu o le telefoni fai mai, e malo tatou. O le tamaitai lea e i le fale telefoni, ua leva ona faalogologo i le laina a si toeaina ma si olomatua. Ia o lenei foi taimi, a fia fai sau telefoni e faapipii sau telefoni i le tou fale, o lea e faafofoga mai Vaa Ofoia, ia e oo lava i le 2 masina pe 3 masina e apalai ai lau telefoni, e te fiu e faatalitali i lenei taimi i le Ofisa o le Falemeli ma Uaealesi. Ae afai la e te faatalitali i se tupe mai fafo, e ta loa le 7 ona e faalatalata loa lea i le leitio ona e faalogologo lea i le siufofoga o Lavea Levi, po o Pat Mamaia, po o lenei foi taimi i le Afioga ia Kika Ah Kau, le Afioga i le Tamaitai Minisita ia Faimalotoa Kika Stowers. E faalogologo o i e sau ai le lisi o tupe ma faamomoli. Na o le pau lava lea o le mea na mafai ona sau ai faasalalaua nei. A o nei tupe e lafo mai, e le faapea na vili muamua mai se isi ia oe, e te faatalitali lava i le telefoni a sau foi lenei po ua misi, ia na pau lava. Ae afai la e ta mai lou suafa, e faalogologo uma si o outou nuu, ona e alu loa lea i le 2 vaiaso pe 3 vaiaso lea e i luma lea faatoa maua mai ai lau tupe, e te sau la, ua matua tumu uma le tou fale i nai toeaia e omai e inu le ti. Ia, o aso la na, e 2 i le 3 vaiaso

e faatalitali ai lau seleni i le falemeli. Ia ona oo mai lea i le 1990, ua oso mai i faletupe, ae atoa le 2 vaiaso. A o le taimi la lenei, 5 minute maua lau tupe. A o na foi la taimi na o le tasi lava le leitio sa i ai, na o le 2AP. E oo mai i le taimi lenei, o lo o ola pea le siufofoga o Samoa, ae na ou maua mai lena taimi i le 1992, o pule ai le Tofa a Tupai Joe Brown a o laitiiti lava si ona alo lea ua pule nei i le Matagaluega o le Siosiomaga, MNRE. Malo Francis. Mai le tele o nisi faataitaiga le paia e o lo outou mamalu, a tatou toe tomanatu i le soifuaga na tatou ola mai ai, ona tatou malilie uma lea, e sao ua matua tele le suiga o Samoa.

Ona tatou see mai lea i luma i le taimi o le tele o suiga, o le aso 18 o Mati 2005 na pasia ai e le Kapeneta le faiga faavae e toe fuataiina ai fesootaiga, reform ai le telecommunication sector. A o Novema i le tausaga lava lea 2005, ia sa pasia ai loa e le Palemene le Tulafono o Fesootaiga 2005, Telecommunication Act 2005. Ua toe fuataiina ai fesootaiga ma ua tatala ai loa i tua laisene ma ua tuu ese atu aloaia ai le faatinoina o fesootaiga ina ia faatautaia e kamupani tumaoti. O se faaiuga matua tele le taua, mamao le vaai i le lumanai, o lea ua tatou saa ai i maa o malie ma tatou oaoa i faleseu i le tulaga maualuga ua i ai nei fesootaiga. Ae le tatau ona galo, o i le faavae mautu na fausia ai fesuiaiga o fesootaiga i na taimi. E tele laisene na faamatuu atu, o le SamoaTel le isi, o le Telecom Cellular le isi, ia ma le laisene e tasi sa tuuina atu i le Digicel ma le CSL i le la faigapaaga ina ua malo i le tauofoga sa fai i lena taimi. O le masina o Oketopa 2006, na tatala aloaia ai loa le kamupani a le Digicel i Samoa, ma o Samoa le atunuu muamua o le Pasefika na amata ai le kamupani lenei a le Digicel ia ma faasolo atu ai loa i Papua Niu Kini, o Vanuatu, Toga, Fiti ma isi atunuu o le Pasefika. Na amata mai le 2006 seia oo atu ia Aperila 17, 2012, faatoa amata ai loa ona faaaogaina le 3G aua na amata ane na o le 2G. O kamupani uma la nei e 2 o le Digicel ma le Blue Sky ina ua maea ona faatau e le SamoaTel le Blue Sky i le 2011. O le aso muamua lea na tatala ai loa le initaneti i luga o telefoni feaveai, faatoa amata ai loa lea ona tatou vaaia telefoni ia saveu, Smart Phones. E ese foi la lea laasaga aua ua mafai ona siaki au imeli, fai au pepa foliga, facebook, lafo lau twitter, ia ma le tele lava o isi mea fou uamafai ona fai, ae le i mafai ai lava i le taimi lea ona maua le mea lea o le talanoa i alaata, video call, pe maua foi ae le mafai ona manino, e matua nenefu, aemaise lava pe a leaga le tau aua o le taimi lena o satellite.

Lau Afioga i le Fofoga Fetalai ma le mamalu o le Maota, o le lala maoti o fesootaiga. E 3 Matagaluega i nei lala maoti, o le Matagaluega o Faasalalauga ma Faamatalaga Faatekonolosi, o i latou nei e nafa ma so o se faiga faavae, o le policy arm lenei o le Malo i tulaga uma o fesootaiga faatekonolosi, e aofia ai ma le 2AP ma le Digital TV i tulaga tau faasalalauga. O le Ofisa o le Pule Faatonu, o i latou ia e faatulagaina ma faatonutonuina totogi o laisene ma tau o fesootaiga i telefoni faapea foi le eletise. O faasalalauga, o le falemeli, o le puleaina ma le faasoasoina ma le faamaonia o totogi o alaleo ma fusi o alaleo, spectrum e faamatuu atu i pisinisi pe a talosaga mai. O i latou foi e

pasia so o se masini tekonolosi lava e aumai i totonu o le atunuu. Seiloga lava e uma ona siaki e le Pule Faatonu ma ua mautinoa ua maua uma mea uma e tataua ona ausia ona faapena lea ona faaogaina i totonu o Samoa. E oo lava i drones ia tatou te faaogaina i le taimi nei, po o tamai vaalele pueata ia i luga o le ea. Ia, o le falemeli o Samoa, e le tau faamatala, o i sa lafo ai ma taunuu mai ai tatou meli ma faamomoli e le gata i Samoa nei, a o atunuu foi i fafo. Ma isi auaunaga o le a outou faafofoga i ai mulimuli.

O le 2017 sa faalauiloa ma pasia ai le uluai fuafuaga alumamao a le lala maoti leni. O i ina na amata toe fetuunai ai nisi o fuafuaga ma faiga faavae sa faataoto mai i tausaga i ona tua atu, ina ia mautinoa ua atagia ai le tulaga ua i ai le atinae tau fesootaiga ma auaunaga tekonolosi ua i ai leni vaitau, ma e mafai ona limataitaiina ai galuega ma lona faatinoga mo le 5 tausaga e amata atu i le 2018 seia oo atu i le 2022. O le miti po o le vaiga taulai a nei lala maoti, ia taugofie ma talafeagai fesootaiga ma auala faatekonolosi mo tagata uma.

E 3 lava manulauti po o sini autu sa faataoto. 1. Ia maua e tagata uma fesootaiga talafeagai ma gafataulimaina. A toe faafaigofie, ia lelei, ma vave ma taugofie fesootaiga. 2. Ia atiae tomai ma agavaa moommia tau fesootaiga ma auaunaga tekonolosi e tali atu ai i manaoga o le atunuu ma le itulagi leni o le Pasefika. 3. Ia faaogaina fesootaiga ma auaunaga tekonolosi, e faaleleia, vave atoa ma manino ai ma le faaituau le tuuina atu o auaunaga a le Malo. O nei miti ma manulauti ma manaoga tulituliloa ua faataoto ina ia o lelei ma fuafuaga alumamao a le Malo o lo o i ai, o le taiala o le atinae o Samoa, Strategy for the Development of Samoa 2017-2020 i lona taunuuga moomia e 11, taunuuga moomia e 11, ina ia faaleleia ma taugofie auauna o fesootaiga faatekonolosi i le atunuu atoa. E le gata i lea, e faapea foi ona ogatasi ma isi foi fuafuaga a le Malo ua ia i nei, le Samoa 2020-2040, le Samoa 2020-2040 mo le lumanai. O le a tau ia na o se pua e ula lau Afioiga i le Fofoga Fetalai i le tele o nei galuega a le lala maoti sa faatino ma e aofia ai ma ana paaga i lea 5 tausaga o le a mavae. Faatasi ai ma se ata faataoto mo le 5 tausaga agai atu i le lumanai ma o le faasolo atu i lalo i manulauti e 3 e pei ona taua i luga. O nei galuega uma sa galulue faatasi uma ai le lala maoti, aemaise lava i le Matagaluega o Fesootaiga ma le Pule Faatonu ma ana paaga i le private sector ia po o kamupani tumaoti uma i totonu o le atunuu.

O nisi nei o galuega sa mafai ona faatino e tali atu ai i le manulauti 1 faatasi ai ma galuega faataoto mai. 1. O le uaea lea o fesootaiga i lalo o le sami, le Tuisamoa. O le uaea leni o le uaea a Samoa, ma sa tatalaina i le masina o Fepuari aso 18, 2018. Na fausia i le fesoasoani mai a le faletupe o le lalolagi, o le faletupe o Asia ma le Pasefika, faapea foi le fesoasoani a Ausetalia ma fesoasoani tuuina mai e Malo Afaatasi e auala mai i le UNDP. O le uaea lea e sau mai Fiti, ona pipii foi lea i ai ma fesootai i ai le isi motu o Fiti e sau i le south, fesootai i ai ma Uea ma Futuna, fesootai i ai ma Savaii, ia ona taulai mai lea i Upolu nei.

O le fausiaina o le uaea lenei o fesootaiga i lalo o le sami, o se tasi o atinae taua, ma e lelei ma aoga o fesootaiga i le tatou atunuu mo nei ma le agai atu i le lumanai. E le gata la ua matauina ai i tatou lava fesootaiga faava-o-Malo le tatou gateway lea international e control ai ma monitor tatou traffic, ae ua televave, lelei, atoatoa ma ua taugofie ai fesootaiga tau initaneti. O le tala moni, a na leai le uaea lea o le Tuisamoa, e le gafatia e satellite le tatou fesootaiga ina ua tulai mai le faamai o le Koviti-19, na tapunia uma ai femalagaaiga faava-o-Malo, tapunia ai ofisa, o galuega ma pisinisi, ae galulue mai i aiga. E le gata i lea sa tapunia ai foi aoga, o fesootaiga lava tau initaneti, lea sa faaaogaina mo fesootaiga i aiga e faatino ai aoga ma fefaatauaiga faapisinisi, faapea ma fonotaga e faaaoga ai fesootaiga tekonolosi.

O le pine la o lea mau, e le i mafai i aso ua mavae a o tatou faalagolago i satellite ona faaaoga telefoni ma masini computer tatou te talanoa ai i ala ata video calls. Peitai, o le televave ma le taugofie ua i ai nei fesootaiga faava o Malo i nei aso, ona o le uaea lea o le Tuisamoa. O lona uiga, faatasi ai ma galuega faaleleia a le kamupani telefoni, le Digicel ia ma le Vodafone i totonu o latou ofisa ma le atunuu atoa, lea ua molimauina ai le lelei atoatoa o ia talanoaga. Ua oo lava foi i maliu, ia lea ua outou silafia e le tau faamatala. O lenei taimi ua le mafai ona feoi mai aiga, e molimau mai lava i o tatou aiga, faalogologo atu tatou i inei, ia molimau foi tatou faalogologo mai, pepese faatasi i le pese lea e usu i inei a o la e pepese mai ai foi o. E le gata i totonu o le falesa, a ua oo lava i fafo po o fea lava o le togavao e i ai le tuugamau, e leai lava ma se mea e misi i le maimoa mai a fafo i le tulaga ua i ai nei fesootaiga, faataunuu ai foi fonotaga a aiga, o aso fanau ma le tele lava o isi faamoemoe taua. Ua matua sefe tupe i le malaga mai fafo a tatou aiga, ae ua pei lava Samoa i lenei taimi o mafutaga ma faalavelave ia ua tatou masani ai lava. Afai la o oe o le tagata e te masani i fefaatauaiga foi ia i luga o le stock market, ia po o luga o fefaatauaiga o le lalolagi foi lea e fai e atunuu i fafo. E te le toe tau alu i Amerika po o Saina, e te mafai lava ona e tago i lau telefoni ki ona e oso lea aua o le tele ia o platforms lea ua mafai ona e trade ai i le taimi lenei ma e fefaatauai ai ma e silasila ai i le agaiga, o fea kamupani eseese i le lalolagi. O lea na ou tago nei lava siaki lau telefoni ae ou te le i tu i luga ma ou iloa ai, o le value o le big coin lea ua i ai, ua oo atu i le \$49,000 le maualuga. Ia, a fia faatau la sau sea, e faatau i le \$49,000 ona e faatali loa lea i sau tupe e maua mai ai. O tulaga ia sa le mafai ona tatou faia, a o lea ua mafai ona fai i le taimi lenei i luga o telefoni. Ua pau maualalo le tau o fesootaiga lau Afioga i le Fofoga Fetalai ma le mamalu o le Maota o Samoa ua faafogafoga. O le Pule Faatonu lea e latou te faatonutonuina le tau o fesootaiga. E tiga lava po o lea le taumafai o le Vodafone po o le Digicel e sii i luga a latou tau, ae faapena ona taotaomia lava i le faatonutonga a le Pule Faatonu. E taofiofi ai i le tau. O le aoga lea o le Pule Faatonu, e silasila i le kamupani telefoni ae sili ona vaai i le mea e lelei ai le atunuu. O le tau la ua faaaogaina ai nei initaneti fuafua i aso la, aua o aso ia na ou

faamatala atu i le amataga i taimi sa faaaoga ai telefoni vili, e \$10 i le minute, faasolosolo mai i le 1990 ua \$6 i le minute. A o le taimi la lenei, a faapea o lea ua tele ina e talanoa i luga o lau telefoni foi lea i le internet, sa maua kegabbytes i lena taimi a o le i taunuu mai le Tuisamoa i le \$8 i le kegabbyte e tasi. O le taimi lenei, e mafai lava ona e maua i le \$1 ia po o le .50 sene, ia po o le leai foi pe a faapea e fai faalauiloa a kamupani uma e 2 o le Vodafone ma le Digicel. O le uaea lena o le Tuisamoa, o le isi uaea ua faataunuu ai lava le manulauti lea numera 1, o le uaea lea o le Manatua, Manatua Cable, lea ua taunuu mai ma ua faaaogaina. O le uaea lea e sau mai le motu o Tahiti, e 2 ona motu e faafesootai i le uaea, ona agai mai lea i le Atu Kuki, e 2 foi motu o le Atu Kuki ua fesootai i ai, agai mai i le motu o Niue ona taulai mai foi lea i Samoa nei, fesootai ai lea ma le Tuisamoa. O le lagona maualuga o le Malo aemaise le kamupani o le Samoa Submarine Cable sa taumafaia nei cables, ina ia i ai se uaea e tua i ai tatou pe a motu le uaea lea o le Tuisamoa. Ia lea laua maua le tatou uaea lea e tau o le redundancy, a motu mai i oso i i. Ia, tatou te le fia oo i le mea sa oo i ai nai o tatou uso tuaoi ia Toga i le vaitaimi na motu ai le initaneti.

Tofa Olo Fiti Afoa Vaai: Lau Afioga i le Fofoga Fetalai, na o si mea lava lea e fia maua ai se malamalamaaga lau Afioga.

FOFOGA FETALAI: Pe sa lavea i le...

Tofa Olo Fiti Afoa Vaai: Ia sa lavelavea atu ai lava lata tala i mea o... e leai e faigofie lata fesili lau Afioga. O lea sa manino le saunoaga a le Sui Minisita o Aoga i mea ia o pyramids scheme ma mea o big coin ma mea faapea e faapea e le lelei. A o lea ua ou faalogologo atu nei i le Afioga i le Minisita, o lea e uunaia i ana faiga faatekonolosi i nei ona po mea na o big coins ma mea na. Ua ou le malamalama po o le a le sao, pe lelei pe faale-lelei le mea lea i le faaaogaina o lana tekonolosi.

FOFOGA FETALAI: Malo faafetai. O lea ua maua atu ua matua sese tele lou tulai mai, ioe. O lea ua e taua le Minisita Lagolago o le Ofisa Aoga, a o le Minisita o Fesootaiga televavave lea o lo o... Se i tulai mai Lufilufi, Minisita Lagolago o Aoga.

Afioga Alaiasa Muagututia Moefaauouo Malagaitutogiai Sepulona Moananu (Anoamaa Sasae): E aoga foi se i fai si na malologa laititi a le Afioga i le Minisita. Ae o mea ia na ou taua, leaga mo le malamalamaaga o le sui lea e saunoa, e tele ituaiga Coins ia ua...a o le Big Coin o lea la ua faamaonia e le lalolagi, e genuine la ituaiga investment lea. A o isi la vaega leaga e i ai ma isi coin ia e le o maua e le sui o Salega, lea na agai i ai sau faamatalaga i le aso lea. Ae aveai foi lenei taimi, se i ou faafetaia ai le Afioga i le Minisita i le talaaga lea i le siitiaga o le tulaga o le tekonolosi. E leaga o au, o au le isi tagata na ola mai i le galuega a si ou tama sa fai i aso ia, i mea omiomi foi lea sa

faaaoga e toeiina, o le morse code. Sa taaloalo ai le toeaia e tali ai tupe mai fafo ma faailoa mai ai i afiafi, i tala a le 2AP. I'm a product of technology, o le mea lena o lea ou te fiafia ai e faalogologo, ae ua ese lenei vaitaimi. O le mea lena e momoli ai lau faamalo i le Afioga i le Minisita mo nei faiga lelei, e le toe fia oo i tua tatou. Ua tau feololo le alu o le atinae lena o le lelei o le Minisita, a o le Minisita Lagolago e faale lelei tele le alu a le Minisita Lagolago. Ma le agaga faaaloalo.

FOFOGA FETALAI: Malo. Malie lau Afioga i le Minisita se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le toatele ia o tagata ua gaugau tai \$300, ituaiga pyramid scheme ia. Ma e tele ma lavelave ia mea ia e taaalo ai, lea e gamble ai tagata mo taaloga tau tupe. E tasi lava le faasilasilaga o lo o aumaia e le Faletupe Tutotonu, e pau lena o le mea ia faaoga e le atunuu lenei, faaoga a tatou tupe, teu a tatou tupe. Soia ia le fetosoina mafaufauga i ituaiga mea nei e taaalo tupe ai tagata. A gau lava le fia selau afe e le afaina. Ae ua tauau ina sese atu ai ma tagata matitiva i le o aitalafu mai tai \$300 mai isi tagata i mea la ia, o ituaiga taaloga suetupe ia, ua tele ina gaugau ai tagata.

Lau Afioga i le Fofoga Fetalai, o le mea lena, o lea ou te talanoa ai, e laga mai loa mataupu ia, e tasi lava lau tali. E sefe lava le o e teu a outou tupe i le faletupe, ma faaoga a tatou tupe. Soia ia tou te faalogologo ma seetia outou manatu i mea ia e sau i fafo, e leai se isi e malamalama ai. E na o le uma ane ua gaugau ai. Ma lou faamoemoe e le toe taua ia mea o coin ea po o a i le lauga a le Minisita.

FOFOGA FETALAI: E masalo o lea ua faamalieina foi ma malamalama sui o Salega i le mea sa fesili ai, malo faafetai e aoga foi. Ou te fautua atu i lau Afioga i le Minisita, se tuutuu maia i le papau le saunoaga ma e fua foi i tatou itula faigaluega. Aua e te saunoa i mea na o oe e te malamalama ai ma le Palemia.

Afioga Hon AFAMASAGA LEPUIAI RICO TUPAI: E leai, faafetai foi i Afioga i sui mamalu, ua maua si na avanoa e fai ai si na malologa, ae o lea ua maua muamua i i le tali o lau fesili. Ae o le tali lona 2 le la o lau fesili.

FOFOGA FETALAI: Tuutuu maia i se mea lata mai le saunoaga.

Afioga Hon AFAMASAGA LEPUIAI RICO TUPAI: E i ai nei le uaea lena o le Manatua Cable, e faaoga e tua i ai tatou pe a faaletonu mai le isi uaea. Pe faaoga foi i i tatou fesootaiga ae tua i le isi uaea. A o nei uaea uma, e alu atu uma lava fesootai atu, tau i Amerika, o Amerika lava o le tutotonu o faamatalaga ma fesootaiga. O le laina lona

3, o le laina lea a le kamupani o le Vodafone, o lea na tatala aloaia i le masina o Aperila 2009. O le laina lea o le Samoa American Samoa Cable, o lo o fesootai ai Samoa ma Amerika Samoa. O le uaea foi lea e fesootai atu ai Samoa ma oso atu ai foi i luga o isi uaea faava-o-Malo e oo atu lava i Amerika. Oso atu i Hawaii, pe oso foi i le isi uaea fou lena ua i ai a Amerika Samoa o le Hawaiki.

Lau Afioga i le Fofoga Fetalai ma le mamalu o le Maota, o Samoa o le atunuu muamua lea o le Pasefika ua fesootai i ni uaea faava-o-Malo se tolu. A o lea foi e alu agai i luma le faiga o le galuega. O lea ua faatou pasi ane le isi uaea i tai atu o tatou, o le uaea fou lea a le Southern Cross Next. O lea la ua pasi atu, sau mai Ausetalia, Niu Sila faasolo mai Fiti, o la la ua tuu i totonu o le sami le tatou lala, le tatou boundary unit. Ia se i ready foi tatou e fai le tatou uaea, e fesootai atu ai le malo o Tokelau ma agai foi i Amerika. Ae o lo o faauau pea fesootaiga i...

FOFOGA FETALAI: Masalo o tau maua mai e lau Afioga le tuualalo a le Nofoa, e leai e le tau fautuaina e le matapia le manaia, o le faatinoga o le auaunaga i lea itu ma lea itu, o le matafaioi a le Matagaluega ma lau Afioga i le Minisita. Ae manatu i se gagana faafigofie o lea ua faatino uma tulaga ua siitia foi le auaunaga. E pei e faapena se lagona, i lo le tatou o e talatalaaufulu le tulaga o le faatinoga o le galuega i le mea e alu i ai lea cable ma lea cable, o lona uiga afai e fia selau cable, o le fia selau foi lena o le mea tatou te o i ai i lenei afiafi. A o lea e faafofoga mai le Matagaluega, ona o le manatu i le tatou taimi ma le tatou galuega. Ae a fai ua lata ina uma, alofa le sui mamalu e fesoasoani mai. O le tatou galuega e fau tele.

Afioga Hon AFAMASAGA LEPUIAI RICO TUPAI: Lau Afioga i le Fofoga Fetalai, e faamalulua atu. Ona o le aano atoa o le lauga lea e mulimuli mai, e faalagolago i i. E toe tasi a la le uaea lea o le a ou talanoa i ai, ona o tua atoa o le lauga, a le faauma uaea ia, e le mafai la ona malamalama.

FOFOGA FETALAI: Aua e te fai ma e tusi ia Olo, ma le tulai mai o Olo. Vaai Olo i te i ua sipaka i le uaea lena e te fai ma e tusi ai.

Afioga Hon AFAMASAGA LEPUIAI RICO TUPAI: O le taimi la lenei, o lea lava e faatalanoa le isi uaea. E alu atu tatou talanoa ai ma Tuvalu, fesootai mai le latou uaea i le Tuisamoa, ona agai atu ai loa lea i Kiripati, ma agai atu i le Atu Maikorenia ma agai atu ai i Asia. O lo o faia la talanoaga o lena uaea i le taimi lenei. O le vaega lea e totoe o le tatou infrastructure po o le atinae o tatou tekonoosi, o le fausia lea o se tatou data centre. O le ituaiga o le Tier 3 e malupuipuaia ai faamatalaga a le lalolagi. Ona o le tatou data centre lea ua i ai nei mai le 2014, o lo o faatautaia e le Kamupani a le CSL ua tumu, ua le ofi le tulaga ua i ai, ona o le vave o le tulaga o le fesiitaiga o auaunaga ua i ai nei. Ua vave ai ona tumu le tatou data centre lea lau Afioga. Ma o lo o

faia nei talanoaga mo le tatou data centre ma tatou paaga, aemaise lava i Malo Afaatasi, le Ofisa o le UN Resident Coordinator. O uaea ia e 3 lau Afioga, ua mafai ai ona fesootai atu Samoa i atunuu e 11 o le Pasefika. A uma la ma isi uaea faaopoopo ia sa ou talanoa ai, ona atoa ai lea o le 16 atunuu o le Pasefika ua fesootai i ai Samoa. O a nisi faamoemoega o le Malo o lo taumafai ai ina ia fesootai ai i nei laina, ia ma fai ma lenei data centre. O le mea moni, o le agaga lea o lo o i le Malo, e tatai mai le lalolagi i Samoa. E faatosina mai pisinisi tetele mai fafo, high yield businesses i Samoa nei, ina ia lalaga ai le tamaoaiga o tekonoosi o le tatou atunuu, our digital economy. Ia ma avea ai Samoa o le centre o le core o le digital economy mo atunuu la ia ua ou faamatala atu o le Pasefika atoa, lea e fesootai mai i uaea eseese nei, pe a faapea e taunuu uma. O le taimi lenei, o le tau aupito sili lava ona taugata lea e i ai nei, o le agai atu faava-o-Malo i fafo ma o i Amerika. Ona o Amerika la e i ai uma lava faamatalaga ma faaamaumauga o le lalolagi. E moni lava o le taimi lenei o lea e te kiliki atu i lau facebook, si tamai taimi lava lea e te kiliki ma e vaai ma e silasila i ai, ae alu i Amerika le fesootaiga toe foi mai ai, i le miliona ma miliona o fasi sekone na, ona o le vave ua i ai nei tatou fesootaiga. O le vave foi lea, a e video call i le tou aiga i Savaii, e alu lava i o le mea toe sau ai. A o lea foi la, ua le gata ina taumafai e, o le naunautaiga lea e i ai le Malo i le data centre lea, ina ia lau mai la faamatalaga la e i Amerika ma tuu i totonu iinei i Samoa e ala i tatou fai paaga ma kamupani tetele nei, o Netflix, Facebook o le Google ma isi mau kamupani tetele. O lea ua i ai isi kamupani ia ua i ai i totonu o Samoa lau Afioga le Fofoga Fetalai ma le mamalu o le Maota. O lea sa ou taua foi i le isi taimi. O lea ua i ai le kamupani a le Connect Global, o lea faatoa uma toe fai a latou interview e faaopoopo ai latou aufaigaluega i le tulaga ua i ai nei e 30 agai i luga. E le gata i lea o le Kamupani a le WE accounting. O na i tatou tamaiti accounting o la ua faapotopotoga faatasi i le mea e tasi, ae latou te faia atua galuega accounting i le lalolagi, e le ni galuega accounting a Samoa nei. A o lea foi ua amata ona fai le pilot a le tagata faigaluega e toatasi a le Kamupani a le Cyber Security a le UpGuard mai Amerika. O le latou faamoemoe a faapea loa e tulaga lelei le latou scheme lea, o le pilot scheme lea e faapea..

FOFOGA FETALAI: Ua na o se toe faamanatu atu, a e silasila mai i le paia o le Palemene, pei ua iva foi i le faafofoga atu i lau saunoaga. E pei o le tulaga lena, o la e te saunoa i le tulaga o la ua faatino, o matafaioi lava na a le Matagaluega ma lau Afioga ma le pulega.

Afioga Hon AFAMASAGA LEPUIAI RICO TUPAI: O le mea e aupito sili ona tele o le atinae lenei o le fale la ua i luga o le uafu, le e faaleleia uma ai ia tatou submarine cable warehouse la ua i luga o le uafu. Ua tuufaatasia ai uma ituaiga uaea uma e faaleleia ai uaea mai Singapore pe a i ai se mea e faaletonu. O le manatu maua luga o le Malo na taumafai ai le mea la e i tai, faapea ma le kamupani o le Samoa

Submarine, ina ia aua nei umi ona motusia a tatou fesootaiga pe a faaletonu. O le tulaga lena, lea la ua i ai nei i tai, toetititi tumu le fale i taaiga uaea ma parts uma e faatino ai. E 12 atunuu e ona le fale le la, e i lalo o le asosi o atunuu e i ai a latou uaea i lalo o le sami. Sau lava mai i Singapore tau i Hawaii, e 79 km o uaea la e i lalo o le sami. E faaleleia mai i tai i le fale le la faatasi ai ma le vaa. O mea e aupito sili ona tilotilo i ai atunuu ia e i fafo i data centre, o le mea o le clean energy po o le renewable energy po o le eletise mama. Ua o gatasi lava lau Afioga ma fuafuaga a le Malo lea ua i ai, ina ia oo atu i le 2025 ia le ola o Samoa i le eletise mama. O le taunuuga lea o lea mataupu i uaea ma fesootaiga ma le agai a Samoa i le lumanai i ana fuafuaga faataatitia a le Malo. Ma ou te manatu e avatu ai le faamalo i le Samoa Submarine Cable company. I le afioga i le Taitaifono ma le Laulau-a-Fono ona o le silasila mamao i ia tulaga, aemaise lava i le afioga ia Pepe Christian Fruen, e pei o ia lea o le tele o taimi o mataupu faava-o-Malo, o ia lea o le faalagolagomaga o le Malo i le fesoasoani mai aua le finauina o nei mataupu. Aua toe te faamamulua le maea, faaauau pea ona uunai, ina ia ausia le miti o lo o galulue ai nei le Matagaluega o Fesootaiga ma le Pule faatonu ma outou kamupani o lo o fai share i totonu o lea Faalapotopotoga. Lau Afioga, ua lelei fesootaiga i totonu o le atunuu lea ua ou mei mai i Samoa nei. Ua matua faasopolia le atunuu i tatou fesootaiga i le tulaga ua i ai nei. O le isi kamupani o le Vodafone, ua 96% ana fesootaiga i le atunuu atoa. Mai tua atu o le 2016 sa na o le 63 pou, lea ua 100 pou. Le masina na mavae nei, na tatala aloaia ai le 100 pou a le Kamupani, ua faaleleia le agai atu. E laiti lava na i vaega faigata o le atunuu e le i oo i ai, ae o lo o faagasolo pea a latou galuega faapea foi le Kamupani a le Digicel, e 95% le latou foi auaunaga. A o kamupani uma nei e lua, o lo o faaogaina uma tulaga maua o tulaga tau fesootaiga faatekonolosi le 4G+ ma le LGE lea ua mafai ai ona vave ma mafai ona outou talanoa i telefoni. O lea foi na outou faafofoga analeila i le isi poloketi o lo o galulue ai le Matagaluega o Aoga ma Pule Faatonu e ala i le fesoasoani mai a le ITU, International Telecommunication Unit i le lalolagi, lea sa faataunuu lona vaega muamua i le 2017. Lea ua alu lona vaega lona 2 lau Afioga. Faafetai ua manino le TV ua outou maimoa ai, toatele sui o le Maota sa lauga ma faafetai mai mo le TV, ua faasopolia le TV i le atunuu, ua le toe tutusa ma le mea sa i ai, a e oo i Savaii i Falealupo e na o le tasi le channel e ola ai. O le taimi lenei, ua laina tutusa uma laina o channel laina tutusa uma le manino o ata, e leai se mea o faaletonu. A i ai se mea e moomia le faaleleia o lau TV, valaau mai au po o le Afioga i le Minisita Lagolago. O le avanoa foi lenei e manatu e faafetai ai i le Afioga ia Faamausili Andrew Ah Liki, ma le kamupani a le Samoa Digital Limited, le aufaigaluega atoa. O latou ia o lea e feagai ma le faatinoina o lea auaunaga taua. O lea lava e faalogologo atu ia Faamausili lau Afioga Tuiaopo fai mai e gau le mea. Se ou te fai atu ia oe, e leai sou afu pau o ela i le silasila a le Atua. A gau atu i, ae faaoso ane i o e le Atua isi manuia e faamapuna ae i luga ou manuia ma ou tamaoiga.

Faamanuia le Atua i lau afioga ma le kamupani ma le auaunaga. O lea ua uma ona toe faaleleia le tatou 2AP pou faasalalau, ua le gata i Samoa nei, a o lipoti solo mai Alaska o Finland. O le isi taimi sa i ai lo tatou atalii lea o Ari Haselman i Iapani, o i ina pe i sa monitor mai ai le 2AP, faalogologo faalogologo lava Ari ua gogolo atu, text mai i le Minisita, ou valaau mai i le Ofisa. O lona uiga ua mamao lava le tulaga ua i ai le manino o fesootaiga nei o le siufofoga o Samoa. Ma o le taimi foi lea ua faatino ai se FM. O lea ua outou faafofoga i ai i le tulaga ua i ai le FM ua 85% ua soo ai le atunuu. O na i vaega laiti o totoe o lo o faaauu pea le tulaga o galuega faatino. O le manulauti lona 2 lau Afioga a lenei Matagaluega, o le atinae lea o tomai ma agavaa, o le capacity building. Ina ia tapena ai o tatou tagata galuega manaomia mo le atunuu aemaise i totonu o le Pasefika. A o lea ua outou faafofoga mai ua le gata i le Pasefika a o le laloalgi atoa, lea ua tatou faia atu galuega iinei. Ma e tele lava ni galuega faiga faavae sa faapena ona tapena, lavea ai faiga tapenaga o le fuafuaga mo le tatou Samoa National Cyber Security puipuiga o tatou i luga o ala o fesootaiga. O lea foi la o le a faatu le Samoa Cyber Emergency Responds Team Samoa Search, o i, o i latou ia o muaau tau e feagai ma osofaiga mai luga o laina o fesootaiga. O faiga faavae foi ua faamalosi ai Kamupani telefoni, ina ia faamama laina, poloka mea leaga ia e sau i laina aua ne i oo mai totonu o telefoni ma aua ne i maimoa i ai tamaiti aoga. Ma ia vave ai ona momoe tatou i afiafi. O lea ua faatu i Samoa nei ma ua amata fuafuaga a le Malo Afaatasi le UN Global Pulse Lab, o le big data lap lea, e tele le taua mo Samoa. Ma o le mea lona 4 lenei a le Malo Afaatasi i le lalolagi atoa. O Amerika, Aferika, o Indonesia, lea ua 4 mai Samoa nei, ma o lea o le a faigaluega ai o tatou tamaiti ia e omai mai fafo, ua malamalama ma mafai ona ave ma data scientist. O lea foi ua fesootai ma le SPC i New Caledonia, e faapea foi le SPREP, ina ia tuufaatasi faamaumauga ma faamatalaga a le Pasefika, le data atoa a le Pasefika mo atinae, ona faapena lea ona tapena atu i totonu i i, ia faamaumauga uma. O a faamatalaga e manaomia mo atinae, e le gata i Samoa nei a o atunuu taitasi, ma e mapuna mai ai la i i, le tele o atinae fou, aemaise foi i le tele o nisi kamupani fou e moomia. O la foi ua i ai le tatou Samoa Knowledge Society po o le tulaga e teu ai faamaumauga taua o galuega a le Malo, ma faamatalaga uma lava a le Malo ma Iunivesite aua sailiiliga a fanau i le lumanai. Lau Afioga i le Fofoga Fetalai, o le manulauti lona 3, ua faataunuu ai la lea, lea na outou faafofoga ia avea le tekonoosi ma auala e faavavevave ai le atinae ma le tamaoiga, o applications o le technology. E le toe tau faamatala, o lea ua outou faafofoga, o lea ua amataina le tatou atinae o le National ID. O lea o lo o i lalo o le vaavaaiga a le Palemia, o le a faatu foi le tatou Ofisa o Samoa Digital Transformation Authority po o le Pulega o Galuega Faatekonolosi mo le lumanai, o lea o le a faatu aua le faamaopopoina o nei mea uma mo Samoa i le lumanai. Ua lena ua tele ina outou faaogaina ia le tele o isi kamupani fou ia ua mapuna mai i le taimi lenei, ina ua tulai mai uaea o fesootaiga. Outou ia ua mafai ona

faaogaina le Maua App, o le fesootaiga lena, e aumai uma ai lava meamata ma faatauga a nai tama ma tina mai tua. O latou faausi ma mea na, ona e tago lea e faatau mai ai i luga i ina. A o latou e faamaopopoa mai tua, ona tau lava lea o lau faatau. E faapena foi i le seki eat, e te le o toe tau alu i le faleaiga i le taimi lenei pe a pisi, na o le pau lava o le mea o le tuu o le app lea i luga o lau telefoni, ona oka ai lea o lau meaai ma totogi ai, e momoli mai lava ia te oe. A o lenei foi taimi i le le toe feoi, a o lea ua tatou faaogaina le zoom e fai ai fonotaga tetele. Lea na outou faafofoga ai i le tele o fonotaga taua ua faapena ona faataunuina ai.

Susuga Hon Laauli Polataivao Leuatea: Lau Afioga i le Fofoga Fetalai, si mea laititi lava e fia malamalama ai i le saunoaga a le Minisita.

FOFOGA FETALAI: Saunoa mai le susuga ia Laauli

Susuga Hon Laauli Polataivao Leuatea: Sa nofonofu lava ma matau le saunoaga malamalama. A ua faalua ona ou taua le mataupu lenei lau Afioga. O le mea lenei o le tatou Cyber Security ma le Cape Way. E na ona ou toe faamanatu atu lava lau Afioga, e i ai lava lou popolega tele i le mataupu lenei. O lea lava ua atagia, o tatou cables uma nei e agai ese atu ma Samoa, o lo o agai i le Malo o Fiti, ma o lo o i ai lava le faaeteetega o tatou informations. E na ona avatu pea i ina po o le a lau tilotilo i le tatou Cyber Security mo le atunuu, ina ia malu a tatou faamaumauga mo hackers. I le tulaga o faamaumauga ina ia malu, aua o lea na tatou talanoa nei o Fonotaga a le Malo, o confidential meetings e ala i tulaga faapena. Ae na ona avatu le faafesili po o le a le tulaga o lo o i ai. Ma le agaga faaaloalo.

FOFOGA FETALAI: Malo saunoa, sa taua i le saunoaga a le sui. Tulai mai le Minisita.

Afioga Hon AFAMASAGA LEPUAI RICO TUPAI: E fafetai i le faafesili, o lea sa outou faafofoga mai nei lava o faamatala atu le tatou Cyber Security Strategy ma ua galulue ma Ausetalia ma tele o isi Faalapotoptoga e amata le tatou Samoa Search. Ae le o tuua ai galuega o lo o alu i le taimi nei. O lo o fai a tatou paaga ma kamupani tetele i fafo, i Niu Sila ma Ausetalia ma Amerika mo le puipuiga lava o tatou fesootaiga ma le tulaga e ono osofaia ai i tatou i luga o uaea ia o fesootaiga. O le tulaga lea na ou faamalamalama muamua le agai atu i Fiti o le uaea. Ma i lau lauga lea talu ai nei i le Fonotaga o le Tala o le tupe autu, o la e i ai uma lava i totonu. Sa fesili ai foi le sui mamalu, ma ou tali i ai. E le oso tatou ia Fiti, e na o le alu atu lava o tatou taamilo i tua. E le mafai foi..a tilotilo pe tago le tagata i le tatou uaea e iloa atu iinei, e iloa atu lava i inei pe a i si se isi e taumafai e attack le tatou uaea. Ma ua malupuipua e ui lava o lea e le i faatuina le ofisa lea, a e le o

mafai ona tuu, o la e galulue lava tatou Ofisa tutotonu, e le gata i Samoa nei a o fafo. O la e matau mai e galulue faatasi e puipuia a tatou uaea ia. Lau Afioga o le isi tulaga taua lea sa toe taumafai nei.

Susuga Hon Laauli Polataivao Leuatea: Lau Afioga e momoli le agaga faafetai o lea ua maua le finagalo o le Minsita, e pau lava lea, o lea lava tatou te i le atunuu e tasi. Ma o le puipuiga o le mea e taua, a e aafia e aafia uma le atunuu. Na ona matou tuualalo atu lava, e ese foi i latou o lo o aumaia faamaumauga, tatou te le o sefe i le cape way, e na ona faamanatu atu, ae lafo atu pea i ina, o le agaga lena, o la foi e fautua mai isi, tatou te le o sefe. Ma le agaga faaaloalo.

FOFOGA FETALAI: Malo faafetai. E aoga le fautuaga, a o le famaninoga a le Malo, o le faamaninoga lena e taoto i ai le faamalamalamaga o se mea. See ese mai lea vaega.

Afioga Hon AFAMASAGA LEPUIAI RICO TUPAI: O le Malo ua sefe. O lea ua toe lalaga le Faalapotopotoga lea o tamalii uma ma i latou e agavaa i le IT i totonu o Samoa, o i latou ia ua faatelevavae ai le atinae, ma ua galulue faatasi ma le asosi lena a Samoa IT Association, le SITA ma ua faataunuu ai le tele o polokalame mo aoga, ma le tele o nisi aoaoga taua, o lo o taumafai e galulue faatasi ai ma le Matagaluega o Aoga, e aoaoina ai le aufaigaluega. O le tele o avanoa o pisinisi ua mafai ona amatalia, lea na ou faamalau atu, ma o se tulaga e faafiafiaina lea lau Afioga i le tele o nei atinae. Ma o atinae uma ia ua faamalau atu, e pei ona ou fai atu, o galuega faatasi ia a le Pule Faatonu ma le Matagaluega o Fesootaiga ma Faamatalaga faatekonolosi. O le tasi matafaioi aupito sili ona taua a le Ofisa o le Pule Faatonu o latou ia e faatonutonuina le tau o le eletise. Ma e pei lava o le mea lea na ou fai atu ai i le tau o fesootaiga. E po o le a le naunau mai o Kamupani nei e sii i luga le tau, e le mafai lava, o le galuega lena a le Pule Faatonu, e faatonutonu e latou tau i lea taimi ma lea taimi. E tilotilo latou i le tamaoaiga o i ai, e tilotilo i latou i le tulaga o i ai tupe alu i le faagaioiga o kamupani, ona faataga lea pe a faapea e talafeagai ai, ae a leai e tumau lava pe pau foi le tau o le eletise.

Ona faamuliai lea o sau faamatalaga i le vaega lena lala maoti o le Falemeli o Samoa. E tatou te manatua pea le Falemeli lena o Samoa i stamps, o faailoga. E pei o i ina le tatou maketi muamua na ave ai Samoa i fafo o nai a tatou faailoga ia o stamps. Pue atu ata o tatou laufanua, o ata o na i o tatou tagata, ona lafo lea o le stamp i fafo. O i ina sa muamua silasila ai le lalolagi ma moomoo mai ia tatou. Ae le i i ai la ni TV i na taimi ma nei faamatalaga faatekonolosi ua i ai nei. O le tatou Falemeli foi o lo o ave ma ogatotonu e lafo ai meli. O latou lala laitai o lo o i tua i le tele o itumalo o le atunuu, ua atoa nei le 12 o lo o faaaogaina e si o tatou atunuu e tofogi ai le pili o le vai ma le eletise ma lafo ai tupe. O le tupe tele a le Falemeli lau Afioga, o le tupe e maua mai i le quota a Samoa e maua mai le Universal Postal Unit. Ae tele le

tatou tupe e maua i i, ona e omai atunuu i fafo lisi atu le quota lea. Ae o lenei taimi o lo o toa ona o le faamai, o lea e telegese ai te isi.

A o suiga fou ua i ai nei, o lea ua amatalia le falemeli i se faiga paaga. E faipaag ai Faalapotopotoga a le Malo ma kamupani tumaoti, le PPP, Public Private Partnership. O i ina lea o le a see i ai le Falemeli i le taimi nei, ma ua amata tapenaga. Ma ou te manatu foi, e momoli atu le faafetai tele i lau Afioga i le Taitaifono ma le Laulau-a -fono a le Falemeli. O Samoa mo le galuega fita o lo o outou gapatia ai i le taumafaiga o lenei atinae ma le agai foi i luma. E tatalo lava ia maua lo outou malosi ma faapena ona faasolosolo ai a outou galuega i le manuia.

Lau Afioga i le Fofoga Fetalai, ma le mamalu o le Maota o Samoa o faafogafoga, o le oo mai o le faamai ma le tele o fesuiaiga o le lalolagi, ua manaomia ai e toe iloilo isi laasaga mo le lumanai o si o tatou atunuu. O lo ua faapea ona faataoto fuafuaga a le Malo,

FOFOGA FETALAI: E te le i saunoa i..

Afioga Fuimaono Teo Samuelu Teo: Sa ou taua o la foi e silafia e le Minisita lau Afioga i le Fofoga Fetalai le vaega lea. E na ona toe faafesili lava i ai. Le tulaga foi lea sa ou fesiligia ai le tau lea foi lea e ave i tatou ISP, ona o le tulaga lea sa maua e le o atoa le faaaogaina o le tatou cable lea. A o lea e pei e foliga o lea e taofiofi le vaega lea o le tatou cable, e pei e foliga mai o la e faatapulaa ia le faaaogaina o lo o ave ia tatou ISP providers. Ae pe le tagai ane ai, aua o le tele foi ma le faataugofie e ave ia latou, o le tele foi lena o le taugofie foi lele mo le mamalu o le atunuu ma faaaoga atili ai le auauna lea. O le isi itu o lea sa ou talanoa atu ai. O tatou filters ia i le tatou cape way, aua ua tele tele a tatou cables. Pe o le mea o la e house i se mea e tasi le fesootaiga lea, aua o la e tofu lava le cable ma tatou filters ia. O le tulaga o le malupuipua, aua o le meatonu lea, o le google lava ia. Ou te le iloa pe mafai ona tatou filter ina le vaega lea. Po o i ai se vaega faapitoa ma le auaunaga o faatinoina ai le galuega lea, ia le vaega lea o le tatou auaunaga, a o le taua ia. O lau tilotilo aua o le auaunaga lea pe a e vili le telefoni lea agai i le Digicel i le Vodafone, ona alu lea i luga o le tau, pe vili foi le Vodafone i le Digicel e alu i luga le tau. Ae pe leai se fetuunaiga i le va o tatou faletelefoni ia ma i latou e faia le auaunaga. Ina ia laugatasia le totogi latou ia, ina ia seki ai se tau, ona pule lava lea o le tagata po o fea le auaunaga. A o le mea lea e tupu, o le kolosi loa i le auaunaga a le isi faletelefoni, ia ua alu i luga le tau. Ia, ma le agaga faaaloalo.

FOFOGA FETALAI: Malo. Faafetai. Ia, se i tulai mai lava le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Galumalemana Dr. Sailele Malielegaoi: Lau Afioga i le

Fofoga Fetalai, o le tasi lenei o faitioga faasaga i tatou IT ua taugata le tau o le initaneti. Atonu foi e aumai sina faapupulaga e le Minisita. O le tulaga o le internet, lea e faigofie nei ona faagasolo a tatou aoga faa-fomai, le aoga lea a le OUM, le tatou Overseas University of Medicine. O le aoga lenei sa faalagolago faapitoa lava i le internet, mai lava, o lea ou te tau matau po o le 2006 na amata ai, ma ua toatele foi fomai ua faauuina mai le aoga lenei ona o le maualuga o lana curriculum. O le tele lava o mataupu ma lana polokalame aoaoina, e faaaoaga i ai polokalame a atunuu i fafo, ma e i ai foi taimi e fai ai latou lectures e faatino mai e polofesa i falemai i fafo. A o le internet lava la sa faalagolago i ai. Mai le taimi lenei i le taimi lenei, ua matua tele lava le taugofie o le internet. Ma e pei ona silafia e fai lava sina maualuga tele o aoaoga ia faa-fomai i le OUM, ona e le mafai ona talia oe seiloga e i ai se isi ou degree science ona faatoa mafai loa lea ona e ulufale i i le OUM. O le ala foi lenei na ala ai ona fau le falemai tele le la, ina ua aumai i le Malo le aiaiga, le condition e mafai ai ona maua le resitala e se tasi o Faalapotopotoga i fafo e fesootai ma aoaoga a Amerika tau fomai, na omai asiasiga, na mafai ai loa lea ona resitala aloaia le Iunivesite lea faava-o-Malo. I le taimi lenei na resitala ai, e le i resitalaina faapea le Iunivesite i Fiti faa-fomai. O lona uiga la, e maualuga tele aoaoga ia e aoaoina ai fomai a tatou i le Iunivesite o le OUM. Ma o le tele foi o i latou ia e aoaoina ai, e matua maoae lava le tulaga o latou aoaoga ona o lo o faatinoina i Samoa nei se tasi o polokalame e le o mafai ona faatinoina i Iunivesite i fafo. O le faatinoina lea o le vaega o latou aoaoga e mafai ona o ai ma avea ma tagata faigaluega o le tatou falemai, ma asiasia ai ma faatino ai i ina le latou clinical experience. E le o mafai e le tele o Iunivesite i fafo ona faatino le tulaga lea. O le mafuaaga foi lenei a foi atu i o latou atunuu, e fai a latou suega faapitoa mo le resitala aloaia ai e avea ma professional doctors. E matua maualuluga lava pasi e pasi ai. O lea foi na oo mai le faaaliga ia te au e i ai se tasi o alii fomai na pasi atu i i na ia maua le Young Doctor of the Year i Ausetalia. O lona uiga la, e maualuga tele aoaoga ia e fai i i le OUM ae faalagolago tasi i le taugofie lea ua i ai le tatou internet. Ia se i aumai lava sina au faapupulaga ona o lea lava ou te faalogo atu, e tiga lava ona pau ae fai mai lava isi, e matua taugata tele. Ia aua foi o le tatou atunuu seiloga lava e fai fua ona faapea lea e taugofie. Ae se i faapupula maiga le tulaga lea ua i ai le tatou internet cost?

FOFOGA FETALAI: Malo faafetai. Ia se i tulai mai le Afioga i le Minisita e faamalamalama le itu lea e saunoa i ai le Palemia, sina au saunoaga.

Afioga Hon AFAMASAGA LEPUAI RICO TUPAI: Ia, o le mea moni lava lea na ou fai atu ai i le amataga lau Afioga, ua matua taugofie lava le tatou internet i le taimi lenei. O le tau lea na ou fai atu ai ua pau i lalo i le 80% le tau o le tatou internet. O lea e alaala mai le kamupani

telefoni i i, o le tele o taimi e maua lau kegabyte i le \$1, po o le 50 sene po o le leai foi o se tau pe afai faalauiloa foi ia, ma ua i ai foi a latou faalauiloa foi ia e faatau atoa ai sau poloka atoa o le internet, sau bundle, ia ona faaoga lava lea mo le masina atoa e le alu tele ai sau tau.

O le mea lea na fesiligia e le Afioga i le sui usufono mamalu i le ave fua atu o fasi uaea i o i kamupani, ia se i onosai mai teisi. E \$8 miliona le tupe a le Samoa Submarine Cable na alu o le latou sao lena i le faiga o le cable. Ia se i taumafai e... e le mafai ona tufatufa faapena le mea ona o lea faaoga, e tatau ona totogi muamua share o le kamupani lea sa taumafai...

FOFOGA FETALAI: Malo. Se i toe tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Galumalemana Dr. Sailele Malielegaoui: Lau Afioga i le Fofoga Fetalai, o le itu taua i le faamanino mai lea o le pau o le internet cost i lalo ua taugofie nei i le 80%, o le itu lelei la lea e le o iloa e tagata ina ua faatino a tatou fesootaiga ia e alu i lalo o le sami. Na pau lava le mea lea e faalogo i ai, ua taugata le internet, taugata le internet, taugata le internet, a o lea ua 80% le tulaga e taugofie ai.

E ala ona taua le mea lea, ona o lea foi ua faamanuiaina tatou i le faatu o le first digital library i Samoa nei. E le o i ai se mea faapea i le Pasefika lau Afioga i le Fofoga Fetalai i le fesoasoani mai a le Malo Aufaatasi. Ae taua tele ona o le tau lea ua agai i lalo. Ae mo le tatou Iunivesite lava lea, o le mafuaaga foi lea e toatele ai i latou mai fafo e aoga mai tusi, ae i ai la ma le requirement e tatau ona malaga mai i Samoa e fai a latou lesona la ia i totonu. Ma o le isi la lea auala o lo o toatele ai tagata asiasi maimoa mai, ma ai ai le tele o fale foi nei e nonofo ai tagata e tulata i le falemai, ona o le taua tele o le aoga lea, le Iunivesite lea o le OUM. Ae ou te manatua le taimi na aumai ai, sa ulagia i totonu o le Maota lenei le Iunivesite lenei, a o lea ua toatele tagata i fafo ua faauuina mai ai, ua i ai foi ma tatou fomai lea na aoga i i ma o le isi foi tamalii Samoa lea ua faauluulu i ai le Iunivesite lenei, ma ua faiaoga ai nisi o tatou fomai. O le isi lea atinae taua tele ae faalagolago i le faaoga o le internet.

Afioga Aliimalemanu Alofa Tuuau (Alataua Sisifo): Lau Afioga i le Fofoga Fetalai...

FOFOGA FETALAI: Malo faafetai. O lea ua manino. Ia, e i ai se mea e... ia se i tuu atu lava le avanoa, faapuupuu mai le faauilavea. O se mea e koneti i le saunoaga faamalamalama lea a le... Tulai mai lau Afioga i le Taitaifono o le Komiti o Tupe.

Afioga Aliimalemanu Alofa Tuuau: Ou te tulai atu leaga sa laga soo tele le tulaga lea i le taugata o le internet, na ona fesoasoani atu ai i se 2 minute e faamalamalama atili. O le tulaga lea sa i ai, sa \$10 i le mea e tau o le kegabyte i aso ia ae le i aumaia cables. O le taimi lenei, ou te iloa o le mea lea e tupu, e le o lelei ona faalauiloa tulaga ia, o lea ua le toe faatauina faapena ae ua fai mea e tau o bundles. Lea foi sa laga e le Afioga ia Tafua. O le tulaga la lenei i le tele o mau faalauiloa lea e i ai, lea la e le iloa e nai tagata matutua, o atu lava faatau le \$20 le umi lava ona talanoa, 3, 4 minute uma, ae latou te le i iloa ua faatau bundle.

Mo le faaitaiga lea o le a ou fai atua, e i ai le Malo Bundle lea ua i ai e \$11 a ua 7 au kegabytes, 50 au minute e te talanoa fua ai, ae leai se tau o text mo le vaiaso atoa. O le Fiafia Bundle, e \$7 ae 10 au kegabytes mai le 1 le kegabyte lea sa i ai i le \$10 i aso ae le i faia le cable, ae i ai ma au minute e free, e leai se totogi, e fai ai au text. E i ai super bundles. O le tele o le mau... o le mea la lea e le malamalama ai matou matutua mai tua, o faalauiloa ia, e tatau ona faailoa, ua le o toe mafai ona e tuua atoa lau \$20 i totonu o lau telefoni, e te alu faatau le mea lea e tau o le bundle, lea la ua toeitiiti lava 20 au kegabytes i le \$10 e tasi, na i lo le tasi o le kegabyte lea na i ai ae le i aumaia a tatou uaea ia i lalo o fesoaitaiga. Ia, o le fesoasoani atu lena a le Komiti Tupe ma le faaloalo.

FOFOGA FETALAI: Malo. Ia se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Galumalemana Dr. Sailele Malielegaoui: Lau Afioga i le Fofoga Fetalai, o le mea la lea e taua tele. A ou faa-Samoaina, o lea ua faatagamea le aluga o mea. E lelei la ona faatonu lau Minisita Lagolago e fai ma ona aoga le faamalamalama i tagata, a ave lau tagamea lea e faapea le lapoa ua taugofie, ae a faapea le lapoa, ua atili taugofie.

FOFOGA FETALAI: Ia, e sala ina manino ma malamalama foi. Se i alaala mai lava Olo i lalo faamolemole. Sala ina... ona o le Taitaifono lea o lo o faapena ona taulai i ai faamalamalamaga a Ofisa Sili o Pulega o Matagaluega. Ia o lea ua manino auofala, o lea foi ua saunoa atu le Palemia, se faasoa le galuega, ioe. E tele ai le mamafatu o le galuega.

Ae malie lau Afioga i le Minisita, se i tuu atu lava le avanoa ia Olo po o...

Tofa Olo Fiti Afoa Vaai: Faafetai lava i lau Afioga. Leai ou te molimau atu i le tulaga o le fetuunaiga o tau o mea ia o internet. E pei e foliga e pau mai i lalo, ae o le trick la e i totonu matuai saosaoa lava o le faaaogaina, le matua saosaoa lava o le alu o le faaaogaina o datas a tagata. E pei o si mea lena o lena e i ai. A o lea ou te talanoa atu lau Afioga i le Fofoga Fetalai, o le wifi lea e alu nei a le NEVO, e \$5 ae 2

vaiaso, e free, unlimited. Omai lea e o e faaaoga le tama lena pe a faapea o lea e taugata le Vodafone ma le Digicel.

FOFOGA FETALAI: Malo faafetai. Ia se i malie lau Afioga i le Minisita, ua leva ona tulai mai le sui usufono mo Anoamaa Sasae. Se i tulai mai lau susuga i le alii faifeau po o le a sau fesoasoani i le mataupu.

Afioga Alaiasa Muagututi'a Moefaauouo Malagaitutogiai Sepulona Moananu: Leai na o le faasaoina o le taimi o le Afioga i le Minisita, e i ai lava si au tamai fesili sa fia fai i ai e uiga i fesootaiga ae o mea ia o lea ua tupu nei i le lalolagi, e nofo mai lava le pule o le twitter ma le facebook tape lau account i le latou lava pule. Tulou lava leaga o le mea lena o lea e tau tuli atu ai, o le puiuga lea o le tatou facebook. Ia, po o le a se tatou faiga e fai ai.

Ma le lona lua la, o lea e masani lava ona ou faalogo i le mea lea, tape le facebook. O i ai se malosiaga i le tatou Matagaluega e fai ai le tulaga lea. Ma le faaloalo lava.

FOFOGA FETALAI: Toe pau la lea o le faauilavea. Se i tulai mai le Minisita o Faatoaga.

Tofa Hon Lopaoo Natanielu Mua: Faafetai tele lava mo le avanoa. O lea foi ua ou vaai atu ua latalata ina seu i fanua le sa o le Afioga i le Minisita. Ae e i ai si ata tamai mataupu e pei e tau... o le tulaga lea, o le a se faiga e fai i le gagana, gagana o lo o faia i luga o le tatou Facebook. Ae ou te lagona e tofusua uma lava tatou ma le leo ua faaalua foi i le taimi o saunoaga faasamasamanoa i le tulaga o lo o faia nei. E lelei lelei lava talanoaga i isi vaega o le olaga, ae oo mai loa i le polokiki, oka le leaga, faaletonu, matua matautia lava aemaise lava supporters a le isi vaega lea. O upu ia ou te fia faitau atua, ae leaga ou te musu leaga e manumanu i le faafofogaaga a le atunuu faapea le Maota leaga e mataga. O le a la se faiga pe a faapea o le Matagaluega a lau Afioga i le Minisita e nafa ma tulaga faapea? O le a le mea e tatau ona fai i ai? Lau Afioga ma le faaloalo, o le fesili lena.

FOFOGA FETALAI: Malo. Se i tulai mai le... e a... malolo ia oe Falealili se i e faauilavea i se isi taimi ae se i tulai mai le Minisita.

Afioga Fuimaono Teo Samuelu Teo: Leai o lea e le i tali le Minisita i le tulaga foi lele o le fetelefonai o le Vodafone ma le Digicel, aua o lea e molimau, e te kolosi loa le laina lea, alu loa i luga le tau, aemaise la o le tatou...

FOFOGA FETALAI: Ae a lea e te faafofoga atu i le saunoaga a le Minisita e fia miliona le aitalafu o la e tau faapaleni. E le i faua Roma i se aso e tasi.

Afioga Hon AFAMASAGA LEPUIAI RICO TUPAI: E le i talia le mea lea lau Afioga.

FOFOGA FETALAI: Ia e le i oo i ai, ia lelei.

Afioga Fuimaono Teo Samuelu Teo: Faamolemole.

FOFOGA FETALAI: Faafea ai ua manino mea uma i le saunoaga a le Taitai o le Malo.

Afioga Hon AFAMASAGA LEPUIAI RICO TUPAI: Ioe, ua leva ona tau sue se igoa e faa-Samoa ai le mea lea o le bundle, o lea la ua maua. Faatau sau tagamea. O le mea lea ua tupu e pei e foliga ai ua taugata le internet i la outou silasila, ona ua matua saosaoa lava le tulaga o fesootaiga ua i ai, o le saosaoa o le uaea, toe saosaoa totonu i galuega faaleleia a kamupani telefoni, ia ona o le taumafai lava e faaleleia a outou auaunaga, auaunaga mo le atunuu. O lena e mafua ai ona alu atoa le faaaoga. O lau mea la e fai, o lea la o le a faaaoga loa ma le avanoa e fesoasoani atu ai, a faapea o lau facebook lea sa faaaoga i le po, a e moe loa, tape. Tape lau telefoni pe logout lau facebook, aua a tumau pea le ola o le app i luga o lau telefoni, ia ona alu ai lava lea, e alu alu ai lava e le malolo. Ae pau le mea, tape, tape motu e aua le toe faaaogaina. Ma o le taugofie lena ua i ai fesootaiga. O lea sa outou faafofoga mai nei o Samoa le atunuu ma e le o se tala aveane ai le tala lenei. Ua faamauina o Samoa le atunuu pito sili ona taugofie i le Pasefika i tulaga o fesootaiga. Ia, o gateways, e 3 gateways a tatou lea e i ai. Ma o gateways uma lava e agai uma lava i fafo, ma o lo o galulue faatasi ma atunuu i fafo mo le puipuiga, aemaise lava i le Malo o Amerika o lo o faapena ona agai i ai tatou gateways.

Lau Afioga, o le tulaga lea i le facebook, ia, o lea e silasila ma tilotilo le Malo i le auala e taumafai ai e faaleleia ma puipuia le tatou atunuu i mea nei, ae o le facebook le mea pito i sili ona alu i luga le tulaga o lo o i ai le tupe maua i le tamaoaga i le taimi lenei, ae o le faaaoga a le tatou atunuu sa i ai a o le i sau le cable, e le i atoa se kegabite e tasi. Ia, na fuafua lea e latou foi lea e fuafua mamao ai le faaaoga a nuu taitasi i uaea nei. O le 2016 na o le 16 kegabites na tatou faaaogaina i luga o le paipa, a o le taimi lenei lau Afioga, o le 2021, ua 22 kegabites le faaaoga lea ua i ai tatou ma ua matua maualuga lava. E mafua mai la ona o le saosaoa o le tulaga lea ua i ai le initaneti i le taimi lenei ma le faaaogaina e tatou. Ma o le isi tulaga i faamatalaga, e le mafai ona faaaogaina se iloga e aumai aloaia ni a tatou mau i totonu e tilotilo i ai le Malo. Ma o le tulaga foi lea o lo o i ai lenei vaitau ma le tulaga o gagana i luga o upega tafailagi, tatou lavatia aua e moni lava e mafai ona fai i ai ni auala, ma ia tatou onosaia, ma tausolomua foi ia tatou uma ona tatou taumafai ina ia tatou agai i le tulaga o le puipuia lelei o tatou lava ia ma o tatou aiga e ala i faamatalaga.

O le tulaga lea sa fesiligia e le Afioga i le sui usufono mamalu ia Fuimaono, o le tau sa i ai le fesootaiga lea i le va o le Digicel ma le Vodafone, sa 10 sene. Nei lava i le masina o Novema o le tausaga ua mavae na pau ai, o lea ua pau i lalo i le 5 sene. Ia ua sili la ona taugofie lau Afioga Fuimaono. Masalo sa e silasila i ai ae le i suia le tulaga lea. Lau Afioga o le a uma lau lauga.

FOFOGA FETALAI: Malo faafetai.

Afioga Hon AFAMASAGA LEPUIAI RICO TUPAI: O le taimi lenei i le oo mai o le faamai...

FOFOGA FETALAI: O le lauga a Aana e faapena, aua ne i toe faalavelave se sui usufono.

Afioga Hon AFAMASAGA LEPUIAI RICO TUPAI: Lena. Aua ne i toe tulai mai se sui usufono e faalavelave. Ia ua moomia lava le toe iloilo o le tele o laasaga mo le lumanai o si o tatou atunuu. Ma ua faapea foi ona toe faataoto fuafuaga alualumamao a le Malo lea ua i totonu o le 2040, e tali atu ai i le tulaga pagatia ua i ai nei le lalolagi. Ua faaletonu le turisi sa numera 1 ai le tamaoaiga o Samoa. E leai ma se mea a tatou, o le mea ua tupu ona o le faamai lau Afioga. E leai ni tatou minerale pei o isi atunuu. E leai foi se tatou suauu pei o atunuu milionea o Arapi. Ae ua oo atonu lava le vaaimamao a le Faigamalo i le maualuga o le atinae o fesootaiga ma initaneti agai loa i ai Samoa mo le lumanai. E i ai le atunuu i le lalolagi e tutusa lelei lava tatou lau Afioga i le Fofoga Fetalai, o autafa ane o le Malo o Rusia, o se atunuu matitiva, leai ni latou oloa e ave i fafo, ia ma le leai o ni mea e tua i ai. E 25 tausaga talu ai, sa fuafua ai loa na o le pau lava lea o le mea e ola ai, o le atinae o le tekonoosi ma ia faaogaina le initaneti e fai ai latou galuega. Tapena loa le atunuu lea ma taumafai e ave latou o se atunuu e tulaga muamua i nai o latou lava atunuu tu tuaoi. Nei lau Afioga, o le atunuu numera tasi lea i le lalolagi atoa i tulaga nei o le atinae o fesootaiga, o le atunuu o Estonia, ma na o le miliona le latou faitauaofai. Ua outou faafofoga mai i le faagasologa mai o lauga a Afioga i Minisita, e leai lava se Minisita e le i taua le initaneti.

O le tulaga o le soifua maloloina, o lea sa saunoa ai le Afioga i le Palemia, a o lea foi ua faaogaina i le taimi lenei e atinae ai le tatou E-health. E fesootai uma lava i le electronic mea uma. E faamoemoe uma nei atinae.

O le tulaga i faatoaga, o le electronic foi lea ua maua ai i'a, o le tatou tulaga lea ua faaogaina e sue ai i'a i lalo o le sami, initaneti, tekonoosi. E leai lava ma se Afioga i se Minisita na misi ai le tekonoosi. O le faalagolagomaga lea ua i ai nei tatou lau Afioga, ua mafai ona tatou oo i le tulaga lea ua i ai Estonia. O le mea moni lava lea ou te tau atu. O lo o taumafai foi isi atunuu o le Pasefika e fau nai o latou tamaoaiga faatekonosi, ae na o Samoa lea ua i ai le malosiaga i

le taimi lenei, ma ua atoa uma ai ai mea uma. O fesootaiga, sa outou faafofoga mai i ai, ia o lea foi ua faauouo tatou ma a tatou paaga, ua faatuatuaina tatou e paaga mai fafo, we have a good record with the international partners. Ua taatia fuafuaga a le Malo mo le 2040, an aspiration strategy for the future. Ia, ma le mea sili ona taua i so o se pisinisi e muamua agai e fia alu i se Malo, latou te fesiligia po o se Malo mautu le Malo lea. O se Malo e faatuatuaina lona taitaiga? Is that a stable government, and is it a proven leadership? Ia, sa tatou faatuina le Iunivesite i le \$5 lau Afioga, sa le gata sa fai ma le mautinoa, ae sa fai foi la ma le faatuatua i le Atua. E mafai foi la ona tatou fauina faapea se Samoa numera tasi i le lalolagi i le itu tau tekonolosi.

Lau Afioga, ona faamuliai lea o se faamatalaga, e faafetai atu i si a matou lala maoti ma nai a matou paaga, lea e afifio mai i i le Vodafone, le Digicel ma le CSL, o i latou ia o lo o galulue soosootauau tele ma le Malo ia ma le tele o nai isi kamupnai ISP. E taua fuafuaga, ae sili atu ona taua le tatou faatuatua i le Atua i nei mea uma. Faamanuia le Atua i a outou kamupani. Faafetai i nai a tatou paaga mai fafo, aemaise lava ia i tatou i totonu o le atunuu. O lea ua maea ona faafetai atu i le Digital TV ia ma fale leitio uma i totonu o le atunuu. Malo galue. Faafetai tele lava i Ofisa Sili o Pulega o lau Matagaluega, lau Afioga Fualau Tinousi Tautalaga Matau, lau Afioga Liomatua Gisa Fuatai Purcell, faapea foi lau Afioga Tupai Tupe. Faafetai le galulue ma le faamaoni i tiute uma. Ia faamanuia le Atua i le aufaigaluega uma. E pei lava ona ou fai atu soo ia te outou, e leai lava se isi o outou, pe laititi lau galuega, o lou sao lena tuufaatasi, ia ona atoatoa ai loa lea o le auaunaga a le tatou lala maoti. Faafetai tele i Ofisa Lagolago, e oo lava ia te outou o lo o tapenaina le Ofisa ma tunuina le ti. Faafetai tele. Faafetai i le auaunaga i faasalalauga.

E manatua foi ma le agaga faafetai i latou sa matou galulue i lenei Nofoaiga lau Afioga, le Tofa ia Tuaimalo Asamu Ah Sam, ma le tofa ia Lefaoalii Unutoa ma le Tofa ia Manusamoa Tony Saaga sa galulue i totonu o le matou lala maoti, ia lea ua faasee atu i nisi o kamupani ma galuega fou ua faapea ona galulue ai.

Lau Afioga i le Minisita Lagolago, lou limataumatau lau Afioga Lealailepule Rimoni Aiafi, faafetai tele lava i lou sao i le ta galuega. O le best combination lea ever i le faasologa atoa o le Kapeneta lenei ma Minisita Lagolago. Ia, o se tagata atamai sa faapea ona tele le tuualalo sa faapea ona tuu mai e poupou ai lenei lala maoti. Ia, e tele galuega e mafai ona fai ona o lou lagolago mai lau Afioga Lealailepule. Faamanuia le Atua mo oulula ma le faletua aemaise le lua nofo a alo, a o tapena ai mo Samoa i le isi Nofoaiga fou lea ta te toe fetai ai.

Lau Afioga i le Fofoga Fetalai ma sui usufono mamalu o le Maota, e faamanuia atu i le Afioga ia Honourable Tuitama Talalelei Tuitama, lau Afioga Honourable Faasootauloa Pati, lau Afioga Honourable Aeau Peniamina o lo o faafofoga mai, malo le tautua, malo le tauatai, malo le tautua atunuu. Faafetai o lea ua afu la outou tautua mo Samoa. Ia faamanuia le Atua i malologa, malolo manumalo.

Lou uso lau Susuga Mulipola, leai leaga o oe e te le o malolo, tau lava ina faaae lou sa ona faapena foi lea ona toe tuu i le tai i le isi 5 tausaga.

Lau Afioga i le Fofoga Fetalai, talofa e. Lau Afioga Leaupepe Toleafoa Faafisi, amuia au ua ou maua mai oe, maua mai lau Afioga, i le loloto o le tofa faatamalii e taofiofi iumaea ai ma faapena ona tausaga ai le mamalu o le Maota o Samoa. Faamanuia le Atua i lau Afioga ma le faletua ma le nofo a alo aemaise o le malologa o le a faapena ona e alo atu i ai pe a uma le Aso Lulu. Ia, le paia o le Fonousu a Samoa, faafetai, faamalo le fai o le faiva i lenei 5 tausaga i a outou Afioga. Faamanuia le Atua i le tapena ai mo tatou faiga palota.

Le paia o Ofisa Sili o Matagaluega eseese a le Malo, le paia o le aufaigaluega, malo tautua, maua lo outou malosi e tautua ai Samoa i aso e tele ua tofia ai outou.

Ae faamanuia le Atua ia Tiatia ma le mamalu o lo outou Ofisa aemaise le paia o le aufaigaluega o tautuaina le tatou Maota nei.

Ia, ona ou faasee mai loa lea lau Afioga i si ou itumalo pele. Lou itumalo o Aana Alofi Nu.3 lea o le a liliu o Aana Alofi Nu.4, faamalo le tapuai. Faamalo tatalo.

Si o tatou nuu i Fasitootai ma Vailuutai, le paia aua Falealii e afifio ai Afamasaga ma lo outou Faletolumafua. Afio foi lau Afioga i le Matuaalii Niulevaea, tainane foi le afio o lau Afioga Faumuina e ana le Tupufia, aemaise o le afifio o le paia o le Aiga Sa Lauano, o le paia foi i Maota e afio ai lau Afioga Toleafoa lau Afioga i le Tapaau Faasisina o le Tuiaana aveaumalaga ma le falefia o ou alo aemaise o le afio o lau Afioga Vaafusuaga. Ia, o le paia foi o lea talaga aua le afio o le Afioga i le Maopu o le Tuiaana lau Afioga Tuigamala o le mamalu i Fogalefatu aua le alaalatai ia te oe le alii o aiga, le lua usoga lau Fetalaiga Tutuila, o oe sa e tai alataua, ma le mamalu i le nofo a too aua le Falefitu ma le tatou nuu i le Falefasitoo. O paia ia aua Fasitootai ma Vailuutai.

Le paia i si o matou nuu i Faleatiu, ia le paia i Malaemasaili e afio ai lau Afioga Letelemaana o le tamaitai tasi o Aana, ae tainane foi le paia o fuafua e afio ai le paia o Feiloivao o le alo o Tuiaana Tamaalelagi, afio Tagaloasa ma le Taofia, a o le mamalu foi i Malaetia e mamalu ai lau Fetalaiga Talimatasi ma le mamalu i le Faleaana.

Ia ma si o matou nuu i Satapuala, i le afio o lau Afioga i le Saoalii lau Afioga Toalepaialii Toivao, le paia aua o oe e te matua i tofiga a le Aiga Sa Tuala. Le afifio o le paia o le Aiga Sa Tuala, ia o le mamalu lea o Vaiauau, ae tainane le mamalu i faletasi le alalatai o lau fetalaiga Vaili o le tootoo o Maauga. O le Laaunafausia ma le mamalu o le Nofoaala aua lo outou Faleaana. O le lauti na laulelei aua Tapuala ma le mamalu i le Vainalelepa o lo tatou nuu. Ma si matou nuu i Sagafili. Le susu o lau susuga i le Faafeagaiga, ma le paia i le ekalesia ma le mamalu o le Usoalii, le paia i Etena fou, o le igoa lea o si o matou laumua i Sagafili. O le nuu o valoaga e faapena ona afifio ai le paia i le Usoalii aemaise le nofoatoo. O mamalu na ma paia o afioga o si ou itumalo. Ae le mafai ona faagaloina ia le nofo a faafeagaiga i totonu o si o matou itumalo. E le gata i lea o nai outou faletua i Fatafaitaulaga e

fia i totonu o afioaga taitasi. Ae faamuli ai i le tapuaiga malu a na i tama ma tina matutua. O lo o tapuai ma tui mai le mulipapaga i outou maota ma laoa e tapuaia ou faiva aemaise faiva o le Palemene, o lo o alo i ai ma sa alo i ai i lenei 5 tausaga o le a maea.

Si ou itumalo e, faafetai i le tapuaiga ma le tatalo le leoa, sa faia lava le faiva o le faamatua. Talofa ua e sautia, ua e velasia foi i le magalafu a o faapena ona ula le tauasuasua, ma tatalo mai a o alo la outou auauna i faiva o Fogalemalo aemaise le tatou itumalo. O a ni galuega ma atinae ua faatino e lenei Nofoaiga, tatou faafetai i le Atua. Ia tatou aeae lea manu ua ulu e pei o le faiva o manu laiti. Ae tatou tepa taulai i le lumanai i le Atua ma a na faamanuiaga e sasaa mai mo i tatou. O lau tatalo afai ua mai le Mataiva, tua i Punaoa. E le atoa la outou auauna, faamagalou sou sese i lo tatou va nonofo. O le tatou alo atu i le faiga palota, ou te tatalo ina ia fai malu o tatou faiva. Aua ne i laga se peau, ma ia o tatou filifili faatasi ma le Agaga o le Atua, o Ia e tofia le isi faipule o lo tatou itumalo. O Ia lava foi e toatasi e tofia Taitai o Samoa mo le isi 5 tausaga o le a sosoo nei. Ia faapaiaina pea la outou osigataulaga le paia o le afaigaluega mo le Atua ma Lona finagalo paia. Ia to manuia o le Atua i totonu o aiga ma ia toia o ta eleele ma le sami i lona tamaoaiga. Faamanuia le Atua i fanau uma ma tupulaga talavou o lo ta itumalo. Ou te fia aumaia le feagaiga a le teine Moapi i le Tusi Paia mo taua. O le mea e te alu i ai, ou te alu ai foi, o le mea e te nofo ai, ou te nofo ai foi. E fai lou nuu mou nuu, e fai lou Atua ma ou Atua. O le mea e te oti ai, ou te oti ai foi. A ia faia e le Atua e pei ona ia finagalo ai. E le o toe tasi lou aiga, e le o toe tasi lou nuu, o oe lou itumalo, lou aiga ma lou nuu. Soifua ma ia manuia le Fonousu a Samoa lau Afioga. Faafetai.

Na faaalua le agaga fiafia o le Palemene i le patipati o latou aao i le maea ai o le saunoaga a le Minisita o Fesootaiga, Faamatalaga ma Fesootaiga Vavave Faaneionapo.

FOFOGA FETALAI: Ua faamalo saunoa, o le upu lava e fai i le saofaiga a le toa-ono ma le mamalu o Lalogaafua, se ua malie taliga e faalogo ua malie mata i vaai. Ae o le upu foi e fai ia Saleaamua o lele ua silamio le faafoga a le Palemene, aemaise foi o le tapuai mai a lou itumalo. Ae a Samoa i lona aotetele. E le tau laeia i se upu pe tau sulaina foi i se gagana le toga e fai ai toga. E leaga o oe na e matematea Malo aua le itumalo o Aana. O oe foi o Satuala. A o le ta usoga foi leaga e te matua o oe o le Alii o Aiga, o Tutuila ma Ape. Malo tapena, a fua i le atinae ma le faamuamua a le atunuu, so o se atunuu e faamuamua le soifua maloloina ma le itu tau i aoaoga. Ae i le taimi o le Koviti-19 a na leai lau tapenaga, e le taunuu le faamoemoe i aoaoga ae faapea foi le puipuiga o le soifua maloloina. Ae a tuu foi i atinae o le atunuu i so o se matata. E faalagolago i le itu tau i fesootaiga televaveve. O le mea la lea, malo galulue, leitioa foi a tofi oe e le toeaina e te Minisita o Fesootaiga ona leaga o lea sa e matematea Malo

i le mea e goto ai le la, se i tulou. Aua o upu lava e fai i a Upolu, e faapena se lagona. Ona faapea lea, ua lava ia viiviiga i te i ua faapea...ae fono faapipii se lagona i lau faafetai, aua le afifio ma tala mai o aao i le paia maualuga i tupu ma ee ia o lo o faapena ona latou lagolagosua ma tautua e ala i fesootaiga televavave, ma faamatalaga televavave, kamupani ma Ofisa Sili o Pulega o ona tulaga tofi, malo galulue. O upu e fai i atua, ua setogi le seuga ua laga i tila ua faapulou le tualima. A..se ua malo fai o le faiva. Ua malie le papa i Galagala ua malie ma le lautua le Fagaipaa aua oe le Fagaifoa, aisea? Ona o lo outou galulue. A na outou le tinou e faatino le faamoemoe e le manuia foi Samoa i lena itu o le tatou galuega. O le mea la lea, o le matou foi faamanuiaga, ia alofa le Atua, ia lolou mai le lagi manuia aua lo outou paia ma lo outou mamalu. Ia sagai ane ai o le tai ia faapena ona faaauppegaina outou i le tino o le mafaufau faapea foi le agaga. O le matou tala lea e fai ma sui o le Palemene. O le mea la lea, o le matou tala, o outou mama na faamanuia le Atua i le galuega. E faafetai atu i le saunoaga, ona o lea ua tatou taunuu tonu lava i le tatou malologa masani.

Ia o le a faataatiaese Galuega a le tatou Fono mo lana malologa masani.

Na faataatiaese Taulumaga a le Fono Aoaofaitulafono mo lana malologa masani i le itula 7:50 i le afiafi ma toe faaauau i le itula 8:37 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 1) 2020/2021.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoaofaitulafono. Malo le onosai, malo foi le tauatai maua le malosi e faaauau ai le tatou galuega. E faia le malologa ua maea ona saunoa le Afioga ia Afamasaga o le Minisita o Fesootaiga, Faamatalaga ma Fesootaiga Vavave Faaneionapo. Ma o le avanoa leni ou te tapa lau Afioga i le Taitai o le Malo mo lau saunoaga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ma sui mamalu o le Palemene. O lea ua toe taliu mai lo tatou Maota ina ua maea ai le faasiligamalosi sa alo atu i ai lo tatou Maota nei, ma ua lagona foi ua i ai le malosi faafouina i le faaauauina o le tatou Fonotaga. O leni ua oo mai ia te au le faasologa o lauga tali a le Kapeneta, ma ou te manatu foi o le a ou le toe agai i utumaaui. Sa amata ia te au ona avatu nisi o faamalamalamaga. O lona uiga na amata

i lau folasaga, o lea o le a ou agai loa i le lauga, i le Tala Faaopoopo o le Tupe sa laga ai nisi o manatu, ma o le a taumafai atu e faamalamalama. O le Tala Faaopoopo lenei o lenei foi tausaga faale-tupe e faaiu i le masina o Iuni o le tausaga nei. A toe tomanatu i taulumaga o le tatou tauaofiaga lenei, ona faataape ai lea o le tatou Palemene. Ae faasauni loa mo le faiga palota lautele, o le tatou atunuu. Sa olo lava le fua ma taputapu ai Minisita o le Kapeneta, ae tuufau a outou saunoaga, sui mamalu sa le faalavelaveina lava. O lea ua matou manatua le toe fonofono foi lenei se i tuafu le saunoaga. Ua matau i tatou tu ma tatou aga o le faaaloalo. Ae ama i Tulafono tumau tulaga ia, o le umi faatulaga o saunoaga i totonu o le Maota lenei.

O tatou ia faiga masani faa-Palemene, e lualuagia Tulafono tumau, i le ava fatafata. E faafoe ai a tatou felafolafoaiga. Ae lafo lava le faatautaiga o le tatou Fonotaga i lau Afioga i le Fofoga Fetalai, o lo o i ai le malosia tutasi e te faauigaina ai a tatou Tulafono tumau, pe sao, o le pule tutasi lena a le Afioga i le Fofoga Fetalai, o uiga ia o Palemene uma lava o le Taupulega. O ala na e sologa lelei ai a tatou felafolafoaiga. O lea foi ou te matau, o le le amanaia o tatou Tulafono tumau o lo o fai ma le malamalama. O se masani ua leva e le fou. Ae mauaalafia ai se tuuaiga le faavaea i fafo atu o le Maota lenei. Ua taofi avanoa, sausaunoa ai isi sui usufono ua faaauau le Fofoga Fetalai. Aisea? Aua o lea o lo o faasalalau saunoaga tuusao o le Fonofono i TV ma Leitio. E faaseegofie ai i latou e le o malamalama i faiga ia, o lo o alu atu i totonu o le tatou Palemene. Pe a na le faasalalauina a tatou felafolafoaiga, e leai leai lava ni uiga nei, e faaalua pea. O le itu taua, e aua lava ne i galo ia i tatou uma. O sui filifilia e pasia tulafono, ia tatou manatua i taimi uma, a tatou tautoga o le loto faamaoni i o tatou tiute. O tatou o taitai o Samoa, na tatou tauto ai, o le taiala paia mo i tatou uma. Ia faamamalu, le dignity of this Parliament. Le mamalu maua o le Palemene lenei ia tutumau ia faatumau, tatou foi o taitai e ao ona tatou amio faataitai. O tatou nuu ma itumalo, aua tatou te faatasina i le ala le mamalu o tupu ma ee na latou filifilia i tatou. Tatou te fai tonu faatasi i totonu o le Maota lenei. O le tulai la o se sui e le fia auai i Fonotaga a le Palemene, e le aiaina, e le aiaina e se isi lava sui. E le tau tauanauina foi pe tau faamalosi e isi sui o lana aia tatau e tuua ai le Palemene lenei, a o faagasolo Fonotaga. Ae e taua tele mataupu nei i le tausaga mamalu o le Palemene lenei. E i ai aulape o lo o i ai e tapu ai uiga faapenei. Ae matau foi ua maaleale le taimi le taimi lea tatou te feiloai ai, e i ai le uta fetalai. Mulimuli ane i le faaiuga o le tatou tauaofiaga lenei, o le a ou faatu ai se lafo aloaia. Ia faatu se Komiti Suesue Faapitoa ua atoa i ai le malosia o le Tulafono o Komiti Suesue. E suesueina ai amioga nei faaletatau, ina ia faataoto mai se latou lipoti mo se faaiuga a le Palemene i le Nofoaiga fou, i lana uluai Fonotaga ia Iuni o le tausaga lenei. Ia vave ona togafiti le pou lea, a o le i ave ma papala. E le faataaloga i vai le faia o Tulafono e atiae ai o tatou tagata i aoaoga ma galuega eseese e puipuia ai lo tatou saogalemu. Aemaise o le faamalosi o pulega mamalu a alii ma faipule, na taitai maia i tatou

mai le pogisa o le soifuaga, faapaupau i le afe ma afe o tausaga, a o le i oo mai le Talalelei i Samoa. O le malosi lena faapulega mamalu a alii ma faipule. O lea lava o lo o maua ai le malu i totonu o nuu aemaise le malu o le Talalelei. A o upu foi lapatai a lo tatou Alii, tatou mataala, mataalia i luko feau e oofu e pei o ni mamoe. Afai na oo lava le tiapolo e faaosooso lo tatou Alii, o le Atua o le lua perisona o le Tasi Tolu Paia po o le Tolu Tasi Paia, le Tama le Alo ma le Agaga Sa o lo o faavae ai lo tatou Malo. O ai i tatou? O tagata faatauva. E leitioa aoao mai lo tatou Alii, tatalo. Le tama e, aua e te tuulafoaina i matou i le faaosoosoga, e power tele le tiapolo. O le Fono Aoao Faitulafono lenei, o le itutino lea e tafatolu i ai pulega o le Malo Tutoatasi o Samoa. E eseese, e tutoatasi lava le Palemene mai le Faamasinoga ma le Pule Faatonu, le Executive. O au lea le Kapeneta ma le afaigaluega atoa a le tatou Malo. E manino matafaioi, o le Palemene poo le Fono Aoao Faitulafono the Supreme Law Making Body, e pasia Tulafono. O lana pule tutasi faamatafaioi lena o le pasia o Tulafono. O le Faamasinoga, o lana pule tutasi lea o le faauigaina o Tulafono e pasi atu e le Palemene lenei, the Supreme Law Making Body of any Parliamentary Democracy. A o le Pule Faatonu, the Executive, o lana pule tutasi lea o le faatinoina o Tulafono. Pe a toe faapuupuu o le Palemene e pasia Tulafono, o le Faamasinoga e faauigaina Tulafono e pasi atu e le Maota lenei, a o le Pule Faatonu e faatinoina Tulafono, manino, manino ma malamalama. E le felaaiai o latou tiute, e sa, e sa i lalo o le Faavae, e tapu ona tago fua le isi i le mea a le isi. O le gagana tuusao e malamalama ai. Aisea? Ua tuueseesea pule nei e 3, o le pasi o le Tulafono, o le faauigaina o Tulafono, ma le faatinoina o le Tulafono.

E tasi lava le faapogai na tuueseese ai, e uu uma loa pule ia e 3 e se itutino e tasi po o se tagata e toatasi, ona tupu loa lea o le pule soona fai, o le pule faavaegaau, pule le mafaufau. Aisea? Power corrupt, and absolutely power corrupt absolutely. O le mafaufauga a tuu loa se power i se lala, o le natura o mea o le faaoga sese. Ina ia taofia le tulai mai o le uiga lea, o le pule soona fai, e tuu loa se power i se lala po o se tagata e toatasi. E tasi lava le auala e taofi ai o le tuu o le power i le isi lala po o le tagata e faafesagaai ma taofiofi ai le malosi ua tuu atu i le isi. I le Tafatolu o pulega faale-malo o le faalupega talafeagai lelei i le tatou gagana. O le fefaatauagai e agai e le isi pule le isi pule. O lona uiga e mataitu e le isi pule le isi pule, po o le spy e le isi pule le isi pule. O le uiga lena, na ala ai ona vae 3 ia power ia. The only way to balance power, is to use power to check power, the concept of the balance of power. O le tulaga lena, o lea e mafua ai, ona tuuvaevae ia le pule lea i le Tafatolu. Ua le o tuuatoa i se toatasi.

Sa uu mau e aiga tupu o le lalolagi pule uma ia e 3. O le pasi o Tulafono, faauigaina o Tulafono, o lona uiga o le power lea e i le Palemene ma le power lea e i le Faamasinoga, ma le faatino o Tulafono sa umia e aiga tupu. E faapea foi ma pulega a Malo, e pulea faavaegaau lea na faia e Hitler na afua ai ona tau le lalolagi ma oti ai le faitau miliona ma miliona o ola o tagata ua faamaumuina. Ona o le matautia

o le mea lea, o le umia o se tagata e toatasi o pule e 3. O lea foi na tupu i Fiti ina ua foua le Malo e le latou vaegaau, e faatolu ona fai. E faatolu ona foua le Malo kemokarasi o Fiti e le ami. O le lape lea o Malo e fai a latou vaegaau, e fai a latou Army. E vave tele le faaososoga o le foumalo. O le anoano o Malo, ua aveese faamalosi o latou aiga tupu, e oo i o latou tagata lautele ona o vaivaiga ia. O a vaivaiga? O vaivaiga ia o le umia o power nei e 3, e le aiga tupu. A lea e aumai manino e le Tusi Paia, ina ua mana'o Isaraelu i se tupu latou te vaai tino atu i ai, e pei o tupu foi o isi Malo faapaupau. Ua le fia faalogo i le Atua, o lo o auala mai ai Poloaiga e ola lelei ai lona nuu, ae faaauaala mai i Ositaulaga sili a le Atua. O lea na faatonu ai loa e le Atua ia Samuelu le perofeta. O le a ou avatu le tupu na mana'o i ai lou nuu loto maaa. O le tupu o Saulo, ma o le a outou tofo i ai, o le a tofo i ai le fanauga a Isaraelu, i uiga faatupu o le lalolagi. O le a ave faamalosi a latou fanau e tauina a latou taua, ma faapologa ai ma isi lava uiga masani. O le pule le faatua'oaia. O uiga na faatupu, na feagai ma tagata lautele, mai lava i taimi o Saulo, le tupu o Tavita, le tupu o Solomona, le tupu o Reupoamo. Ma le tele o Malo o le lalolagi seia tau mai lava i le 16 seneturi i Peretania tele. Na va ai le fogavaa, i le va o le Palemene ma lo latou tupu. Ua finau, ua finau le Palemene o latou e pule i tagata o latou o sui o tagata lautele. Ae finau foi le tupu ia, e leai o au o le tupu silisili. Na iu ina tau, o aso na sa i ai vaegaau a le tupu, e i ai foi vaegaau a le Palemene. E le i umi lava ona tau, ae malolo au a le tupu, ma aumai ai loa le tupu ua faanofo i totonu o le moa o le Maota o le Palemene. Ua noanoa i maea, ae savali mai loa le faaosala ma le pelu ma faauma ai lona soifua. Ma faataoto mai ai loa faiga faavae i le va nonofo o le tupu ma le Palemene o Peretania tele. O le tupu o Le Ao o le Malo, o le a na o le faamalumalu, faamaepaepa ma sainia Tulafono e pasia, e sui o tagata lautele o le Palemene lea. O le faavae foi lena mo Malo uma temokarasi faa-Palemene. O le taupulega o lo o mulimulitai lava e aofia ai ma Samoa. E 200 tausaga mulimuli ane ai, ae foua foi e tagata lautele o Farani ia pulega faatupu e i totonu o le atunuu o Farani, lea e taua o le French Revolution. Na fausia ai le auupega faaosala, faalupe o le guillotine, o se pelu mafiafia, pe 3 futu le lautele agai i le 15 futu le umi. Ua maai le pito i lalo ae sisi i luga o le maea. Ona aumai lea o aiga tupu ua faatootutuli i lalo ae faapena le faapau ifo o le guillotine, e faauma ai lo latou soifua. O ni uiga maoae tele ia na tulai mai i le Malo o Farani. O ni uiga faameaaola ua faia e tagata lautele, e mulimuli ane i le afe ma afe o tausaga, o feagai pea i latou ma tulaga ia, ua le mafai ona o latou faaauauina.

Lau Afioga i le Fofoga Fetalai, o si na tala puupuu lena. Na faaauau mai ai lea o Pulega ia Faa-Peresetene po o le French Republic, sa i ai le tagata o le Philosopher, e igoa ia Montesquieu, ua le fiafia i le vaai i faiga nei i pulega Malo a le Malo o Farani, ona alu ane ai lea i Peretania e fia vaavaai. Po o a Pulega o lo o faatino ai le Malo o Peretania. Na ia mataituina ai, o lea ua faagasolo le Tafatolu Fefaatauagai o Pulega a Malo a Peretania, ona fau ai lea o ona mafaufauga, ma malaga ae ai i

Amerika, i le taimi tonu e faapea o lo o tapena foi le Malo o Amerika ia e faatino se latou Malo Tutoatasi ma tapena le Faavae. Ia ma gauai ai loa, i Pulega ia e tuu eseese ia le Power o le Tafatolu, Pulega Fefaatauagai.

O le eseese, o Amerika, o le Tafatolu a Amerika e fai lava sina malosi o le tuu eseese. E le o mauaina le tulaga o le fetalai, o le fefaasoai o le Power, i le va o le Tafatolu o lo o faatino ai Faigamalo a Peretania o lea o lo o faalupe o le Fusion of Powers. E feuluuluai, e felagolagomai, faataitaiga, Tutoatasi le Palemene, e pei lava o tatou. Peitai a oo ina fono le Palemene, e saofai ai foi ma le Palemia ma lana Kapeneta, ma lana Vaega Faaupufai, uiga ia o le Fusion of Powers. O le fefaasoai o Pule, e le o mafai ona atoatoa le Separation of Powers, le Tutoatasi o le Palemene, felagolagomai.

E faapena foi e pei foi o Niu Sila, e faapena foi e pei o Ausetalia. A oo loa ina fono le Palemene, ua pulou loa e le Palemia ia le pulou o ia o le sui usufono, e saofai i totonu o le Palemene, ma lana Kapeneta, ma lana Vaega Faaupufai. E tasi lena faataitaiga. E mafai foi ona faatea e le Palemene lena, le Faamasino Sili po o le Peresetene o le Faamasinoga, a lea ua uma ona fai. Ae mulimuli mai i le principle lea o le Fusion of Powers, o le malosi e fefaasoai.

A solitulafono sui usufono, Minisita, Palemia, Fofoga Fetalai, e avatu i luma o le Faamasinoga ma tutu ai luma i o ae faamasino e le Faamasinoga. Afai lava e matuia le sala ua ave i uta i le falepuipui e faa-falepuipui ai, fusion of power. O le iuga e fai e le Faamasinoga, iuga uma e fai e le Faamasinoga e i ai lona, e leai se pelu o umia e le Faamasinoga e faatino ai a latou faaiuga. E leai se pelu e sausau e faatino ai, e faapefea la ona faatino? E faatino e leoleo o lo o i lalo o le Pulega a le Pule Faatonu.

A tofi foi Le Ao o Le Malo, e fai e le Palemia le fautuaga e aumai i le Palemene. E faapena foi pe a tofi ia le Faamasino Sili, e le Ao o Le Malo, e i ai le fautuaga e fai e le Palemia, fusion of powers. E leai se tagatupe o i nei i le Palemene, e na ona pasia o le Tulafono o mea tau tupe, o fuainumera ae uu e le Matagaluega o Tupe le tagatupe, o lo o i lalo o le Pule Faatonu. E faapena foi i le Faamasinoga. O lona uiga o le vaega o le Tafatolu, e pito sili ona less dangerous, o le Faamasinoga. E leai sana pelu, leai sana tagatupe.

O le tausaga e 1977, na faia ai e le Faamasinoga o le faamasinoga maualuga i Amerika le va o Nixon ma le Pule o le tautua lautele Administrator of General Services, na fai ai le iuga a le Tafatolu Faafetauagai, faia lea e le Faamasinoga, o le Tafatolu Fefaatauagai, i le malosi tele o i ai le leai o se galulue faatasi po o le laitiiti o le galulue faatasi, ua atagia ai, e le talafeagai mo Faigamalo a le Malo o Amerika.

O se taofi la lau Afioga i le Fofoga Fetalai, e faapea ua pulea e le HRPP le Palemene, ma le Faamasinoga, o le faamaninoga atoa lena. E le faavaea, lea ua ou avatu. Afai e loloto, lavelave ia le mataupu, Taupulega a Malo, lea o lo o mulimulitai ai tatou, sala i le lavelave. Aisea? O lea ua matau mai, o le Tala Faasolopito atoa o Faigamalo, o

fai i nei ona aso i atunuu o le lalolagi i Samoa, Niu Sila, Peretania, Amerika, Farani ma Isaraelu, o lena. E amata mai lava ia Mose ma Arona, Samuelu, Saulo, Tavita, Solomona, Reopoamo Peretania tele Farani, Amerika, Niu Sila, Samoa, se i tau mai lava i le taimi na tofia ai le Peresetene, o Fanua ma Suafa i le pule a le Palemene.

Lau Afioga i le Fofoga Fetalai, e taua lou toe foi i tua i Pulega a Malo ua vaetolu ai le Pule, ona e tau mai i le taimi nei, o lo o tatou faalogoina pea iuleo, sese le iuga ua fai e le Palemene, ua alalai le Palemene i le Faamasinoga. Ua pule le Malo i le Palemene ma le Faamasinoga. O lea ua matau mai, e sese, matua sese o le manatu ma le malamalama i le system of Checks and Balances ma le Separation of Powers.

Lau Afioga o le Fofoga Fetalai, o lea ua o tatou agai atu ina tau faaiiu ia le tatou Fonotaga. Ae e tataua ona fai sina au upu, i nisi o vaega o lo o i lalo o au matafaioi, ona e taua tele le silafia e le Maota lena, o matafaioi eseese o lo o i lalo i lau vaaiga ma lalo o vaaiga a le Minisita, faapea foi ma le vaaiga a le aufaigaluega a le Malo. Aisea? Leaga ua faafaagogo tagiao, i luga o faasalalauga sese, faapea ua dysfunction le Kapeneta. Ua dysfunction ia le aufaigaluega a le Malo, a lea ua 5 vaiaso, o faafogafoga le atunuu atoa, i le lavelave ma le loloto, galuega o lo o faatino e Minisita, Ofisa Sili o Pulega ma le aufaigaluega atoa a lo tatou Malo.

E matua ofo ai le taofi, i ni faasalalauga e le faavaea faapenei. Ese sui usufono ua leva ona saofai i totonu o le Kapeneta ae faafofiga mai, ua na aveina ni faamatalaga le faavaea. O le ala lea, ua faaumiumi ai le tatou Fono. Se i faafofoga mai i latou, le mamalu o le atunuu i manatu o faasalalau solo, e le gata o Samoa nei a o fafo, i le vaai maualalo i galuega o lo o faatino e Minisita, toe vaai maualalo i galuega o lo o faatino e le aufaigaluega a le Malo. O le aufaigaluega a le Malo ua foi mai ma faailoga maualuluga, mai i fafo.

O le tulaga lena, ua le mafai ona alofia ai, le agai o Minisita e talatalanoa, i a latou matafaioi. O le tatou Fono lena e tatou te fonu ai na o le 4 itula o taeao o aso taitasi, a tuu i tatou Fonotaga masani e fonu ao ma fonu po, lea faatoa, tusa faatoa 3 vaiaso. Ia ae a tuu foi i Fonotaga e masani ai Palemene o atunuu i fafo, e tai fonu faasoloatoa i le tausaga, o lea ua o tatou lalata i ai. Ma e le mafai ona alofia le mea lena lau Afioga i le Fofoga Fetalai, ua tupu le tamaoiga. Ua tupu le atinae o le tatou Malo, ma e tasi lava le mea e fua i ai, e fua i seleni e pei ona autalatala mai manino e le Taitaifono o Komiti o Tupe.

Lau Afioga i le Fofoga Fetalai, o matafaioi i lalo o lau vaaiga, o le Fonu Aoa Faitulafono. Manatua, e tataua ona i ai se Minisita e faauluulu i ai le Matagaluega o le Fonu, aisea? Aua e tataua ona i ai se Minisita e fesootai ma le Kapeneta aemaise ia itu taua nei o le aufaigaluega. E moomia tupe, o lona uiga, e le maalofia soo se Matagaluega, po o le a lava le tutoatasi e tietie ai le Minisita i luga o le sootaga lea, ma le Kapeneta o le itutino lea o le Malo, o lo o gafa ma le Tulafono i luga lava o sootaga ia faa-temokarasi, fusion of powers.

Lau Afioga i le Fofoga Fetalai, o le Matagaluega o le Va i Fafo, ua uma ona ou talanoa atu ai, i le taimi sa alu atu ai lau folasaga, lau uluai folasaga. Ma e pei lava ona ou taua, o le faitotoa lea, o fesoootaiga uma lava o le tatou Malo ma le lalolagi. O a mea e moomia? E fesoasoani ai le Malo ma le va ma fafo. O i le auala, e auala atu ai. O lo o vaaia foi e le Matagaluega lenei, a tatou Ofisa uma i fafo, Amepasa ma Konesula. O a mea e moomia e tatou e faaauala atu, ona o foi lea o latou e fai le latou galuega e fesootai ma Amepasa foi o isi Malo, faafaigofie ai ia tatou talosaga.

Matagaluega o Fuagafanua Siosiomaga ma le Vaaitau, numera 3 lea o lea e i lalo o lau vaaiga. O le Matagaluega lenei sa na o le Fuagafanua sa i ai, ona oo mai lea i le tausaga 1988 i le 1991 ona suia loa lea o le Kapeneta, ua faalautele galuega e na te faatinoina. Ua faaopoopo i ai ma le Siosiomaga. E le o po malae lau Afioga, suiga o le tau, o le mala pito sili lea ona maoae, i le lalolagi e afua i le vevela, afua i le vevela. Ma e o gaoiiga uma lava e fai e atunuu uma o le lalolagi e i ai tatou ma isi foi atunuu, e agai tasi lava i le mea e tasi. Ia tuutuu ifo i lalo le vevela, ina ia oo atu i le faaiuga o le seneturi lenei i le tausaga 2100, toe 79 tausaga ua pau ifo le vevela i le 1.5 tikeri.

A mafai ona tuu ifo i lalo e le lalolagi le vevela i le 1.5 ua faasaoina atunuu uma o le lalolagi. O lona uiga ua le mafai ona liusuavai pole aisa i le itu Matu ma le itu i Saute. O mea uma la lea e tatou te faia, o lo o faia foi e Malo uma. O le autu atoa lea o tatou gaoiiga, e pei o le gaosia o le eletise mai i le la, vai, matagi ia faapea foi ma taavale e ola i le eletise, ia ma le totona o laau 2 miliona laau ia e toto, o faiga uma ia o la foi e uunaia e isi Malo mo le puipuia o le siosiomaga i le tulaga o le taofia lea o le vevela. O le ua ia i a tatou faiga faavae, mo le puipuiga o ia o le sami, aua le maua pea o taumafa.

E 19 faiga faavae o lo o faatino e le Matagaluega o le Siosiomaga, 19 Tulafono Autu, 25 Tulafono Faatonutonu, e 4 Komiti Eseese o lo o gafa ma matafaioi, 20 atinae eseese o lo o gafa ma le Matagaluega i le taimi lenei. O le Matagaluega foi lenei o lea o lo o gafa ma le puipuiga o eleele faale-aganuu, ma tulaga uma i le faagaioiga tau Tulafono, mo le aveina o fanua faale-aganuu aua atinae a le Malo, faapea foi le lisiina o tatou fanua faale-aganuu.

O taimi uma la e lagalaga ai finauga o mataupu nei, e tulai mai le Matagaluega e tutu i luma, latou te faasaosoina le tele o tuuaiga le faavaea. Ia atoa ai ma le backup a le Loia Sili. O eleele uma lava i totonu o Samoa o le faitau aofai e 702 eka, o eleele uma faalea-aganuu, 18, 000 eka, o isi eleele e aofia ai eleele a le Malo ma eleele tau papalagi 133,432. E na o le 1.5 % o le 568,000 eka ia o fanua faale-aganuu, lea o lo o lisi atu. Si tamai mea lava, o lea o lo o mafai ona lisi.

E sili atu ma le 500,000 eka, o fanua faale-aganuu o lo o taatitia e le o faaaogaina. E taua tele le tulaga nei, silia ma le afa miliona ia eka o fanua faale-aganuu e le o faaaogaina, e le o faatoaina. O lisi o i ai nei o fanua faale-aganuu, e 4 ia ituaiga aoga ia e fai ai, ituaiga atinae. 1. o faleoloa, ia ma nai isi pisinisi laiti. 2. o le faatu ai o falesa, aemaise ai

isi Ekalesia e le i... e fou atu, i totonu o isi nuu, ona o atu lea taumafai se aiga lisi ane se fanua faatu ai le latou falesa. 3. o nai tamai faletalimalo, ia ma le 4. o lea e faatu ai pou o le Digicel. O le ala lena, o lea e taumafai ai pea lo tatou Malo ina ia faia Tulafono e faaoga ai fanua nei e taatitia, le aoga.

O Tulafono o le 2019, na toe teuteu atoa ai le Tulafono lea o le LTRA lisiina o fanua lea sa tutupu ai foi le vevesi 2008, faatupu mai e le vaega lea o le SSIG. E omai ai loa e matua le malamalama. Tulafono lenei, e faatu faapitoa, e lesitala ai fanua umia saoloto.

O le 2019 la lea na aumaia ai le Tulafono i totonu iinei, e fai ese ia le lesitala lea ma le tele o le le malamalama, mo le lesitalaina o fanua umia saoloto mo le faatauina atu. Ua le toe faia ni deeds, ona o le tele o faalavelave na tulai mai ai, ia ma le tele o tagata na gaugau ai, ua uma ona totogi ae tau sue ia le deed e le maua. O lea la na ala ai ona sui loa le faiga lea, e le toe faia ni deeds ae fai mo mea o lesitala. O lea na tulai mai ai le vevesi, fai mai o le a faatau fanua. O lea na tuu eseese ai ia le lesitala o fanua ia saoloto, ia ae tuu eseese foi ma lesitala o fanua lisi, ia ma laisene o fanua faale-aganuu. Ma faatulaga ai foi, ia mea ia o fanua, i le tulaga lea e mafai ona... afai lava e tataua ona malilie uma le aiga. Ua atili ai ona faafaigata.

E i ai foi ia le tulaga lea o lo o taumafai i ai le Matagaluega i le taimi lenei, e amata faatino le polokalame i Samoa mo le fefaatauaiga mo kasa kaponi oona, carbon trading. O lea foi ua i ai le latou polokalame amatalia, e amata faataitai ai foi ia le tatou atunuu, i le fefaatauaiga o kasa oona, nei kaponi maketi i fafo. E agai tonu lava taumafaiga ia, i le tuuititia o kasa kaponi, e auala i le toe totoina o le vaomatua, ia ma le faatau o le vao ma e 2 ituaiga o lo o taumafai i ai le Matagaluega. 1. o le faatau i fafo o kasa kaponi oona ua tuuititia, ia ma le 2. o le faatau i fafo o auunaga faale-natura, mai lafanua apovao faaleleia o suavai i totonu o le tatou atunuu. O mea ia lea e faatino i nei ona aso, e uiga ese ma aga eseese mai, ia ituaiga pisinisi o lo o fai e Malo.

Ae mo kasa oona, mo sina faataitaga, o le agaga lava lea tuu i lalo kasa foi nei e alu atu i luga, ma talepe ai le afuafu o le osone. Le afuafu lea e puipuia le lalolagi mai i le malosia uiga ese o ave o le la. Ma afai ua 100,000 tone ua gaosi e ese atunuu, o se isi Malo aemaise lava Malo foi nei e maoae le tamaoaga, e soona faaoga ai le suauu, suauu ia kiso, televave lava la le alu i luga o latou Kaponi.

Ia ae i ai la maliega faava-o-Malo, e ova atu loa i se maualuga sala loa, sala tupe. O lea la e mafai e le Malo lena, ona o i se nuu lea ua tuuititia ia latou kaponi, faatau mai ai ia se latou 100,000 kaponi e cancel ai ia le latou 100,000 lea ua alu i luga, ia ma faasao ai le faasalaga ua alu i luga, ae o lea ua avatu i le isi atunuu, le tuuititia o kaponi e faatau e latou ma tuu ai i lalo, ma le sala ai. Ae faatau, ae manatua foi la, o kaponi nei, e maua mai i le vaomatua. A maua mai la i le vaomatua, e maua mai le seleni, ia ona faasoa lea i le atunuu e ana.. ia po o nuu e ana vaomatua ia. Lau Afioga i le Fofoga Fetalai, ae mafai la ona tuu i lalo a tatou kasa i le toto o laau ma le faaoga o le eletise

mai le vai, le la, po o isi foi auala eseese e gaosi mai ai lava e lo tatou Malo le malosi tau eletise i mea o lo maua lava i totonu o lo tatou atunuu. O ituaiga auala eseese ia, o lea foi e faafeagai ma le Matagaluega. Sa i ai se fesili na tuuina mai e faapea, Lau afioga i le Palemia, i le ta o le 7:00 i le taimi lenei ua matua pogisa lava i le taeao sesegi, alofa le Malo toe sui itula. Fai mai le vaai tau, o lea tatou te i ai tonu i le tau na i ai mai lava i le taimi na fanau ai Atamu ma Eva. O lona uiga o le tau tuai lava lea tonu lava tatou te i ai nei. O lea e pogisa i le ta o le 7:00. O le suia o le tau i taimi lea ua tatou suia faatoa sui ia Aperila, i fuafuaga mamao a le Faigamalo lenei o le HRPP, ae faatino la i le tai 6 masina ma sui. E tuu mai ai i tua le taimi ma faamalamalama ai loa le pogisa lea e i ai o le taimi tuai na i ai mai ia Atamu ma Eva. Ae laititi lava le mea e sui ai. E na ona e tago lava ki le uati, tuu loa i tua. O lona uiga la, afai o le taimi nei, ta le 7:00 o pogisa, tuu loa i tua, o le taimi nei ua ta le 7, tuu loa i tua i le 6:00, o lona uiga o lea e pogisa, e ta ane le 7:00 ua malamalama. Ae faatino mea uma nei, i le fofo faale-maufaufau ua fai e le Faigamalo lenei o le HRPP. O le sitepu lona 2 lena, e 2 sitepu na faatino e le Malo, ina ia sologa lelei ai suiga nei. O le sitepu 1, o le sui o le taimi e amata ai galuega ma aoga mai le 8-9. Na uma loa na sui ia le taimi lena i le iuga a le Kapeneta, ona faatoa liliu loa lea, toe sui loa ma le taimi agai i tua. E alu le isi i luma ae alu le isi agai i tua. Ina ia matua atili malamalama ai le pogisa lea sa popole i ai le Taitai o le FAST, a o lea sa saofai i totonu o le Kapeneta i faiga faa-HRPP, e faaoga i ai le mauaufau ma le vaaiga mamao.

Mo Komiti o aoga, e tataua ona outou tilotilo i le mea lea. Ona o le poloaiga na avatu e le Malo, e amata galuega faatasi ma aoga i le ta o le 9:00. Ae o le a le mea lea e fai e isi faiaoga, o la e amata lava i le 8:00. A o le mea e tataua ona amata uma i le ta o le 9:00 ina ia maua atoa, ia le mamao o le faatofalaiga a le Vaega Faaupufai lenei. E tusa la e 2 itula lea ua toso ai i tua le uati, i le daylight saving. O faiga nei e tai 6 masina, ona e tele le tofa mamao, na mafua ai ona fai. Aisea? E fua faatatau foi o tatou taimi, ina ia aloaia faava-o-Malo. I femalagaaiga tau vaalele, faava-o-Malo ma fesootaiga taualoa faava-o-Malo. E le faapea a pule lava tatou e sui, sui nei, sui taeao, sui tala atu taeao. E leai, e tataua ona vava i le tai-ono masina. O lea na amata atu lau faamatalaga ae tulai le sui sa fesili. Ua aoga foi le fesili ma iloa atili ai e le faia i le pogisa suiga tetele a le Faigamalo a le HRPP. E mamao le vaai, e le gata i totonu o Samoa, a o fafo atu foi o Samoa. O suiga nei e fuafua mamao foi, i le feliiu o le Kelope ma le taamilosaga a le la. I le mamao ma le tulata o le tatou lalolagi i tau mafanafana ma tau malulu o atunuu i le itu i matu ma le itu i saute o le ekueta. O faiga ia faa-HRPP e mamao le vaai. E fua i le taamilosaga o le la ma le masina ma fesuiaga o le tau, e fai i le tausaga. Ua taua tele le fesili lea, fesili mai ai le sui o Gagaifomauga Nu 3. E leaga o le 2 tausaga talu ai, na aumai ai le pepa a le Minisita, o lo o nafa ma le itu lea o le suiga o le taimi. O i ai la le fesili a le sui Palemia na fesili. Po o le a ea le aoga o lea mea, ae sa

matou faia faatasi. Sa matou faia faatasi, sa ou momoo, sa ou momoo i se Minisita, a le malamalama, e tatau lava ona fesili muli mai ia mua mai.

O le vaega faaiu o lau faamatalaga i le galuega o feagai ma le Matagaluega lenei, e tele, e anoano. E alu le po nanei o ou talanoa atu, ona o le isi lea Matagaluega tele. O lea e mafua ai ona fai le iuga a le Kapeneta, o le a vaelua ma o lea foi ua uma ona i totonu o le Faavae. E tatau ona tuueseese le Siosiomaga mai le tulaga o le vaaiga o fanau faale-aganuu ma isi mea. O le mafuie lea na tupu i le 2009, na lulu ma ona aafia e taua tele. Ona o suesuega na faia i atumotu o le Pasefika, na mautinoa ai, le aafia tele o Toga ma Samoa, i le tuanai o le mafuie. Na faamauiina ai le magoto ifo i lalo o laueleele o Samoa, i le 60 milimita, ua goto ifo ai i lalo le laueleele, aafia ai foi ma Toga. Mai lena taimi, o lo o faaauau ai pea le goto ifo o eleele o Samoa tai 8 mita i le tausaga. E mai lava i le 2010. O le vase lea o lo o ou umia mai i i le umi lea e tau i le pito. E fua mai i le tai 8 milimita i le tausaga. O lona uiga, a o le 300 o le umi lea, o lea ua goto ifo ai le tatou laueleele. Ina ua uma le mafuie, ae le o i ai la le tulaga o le liusuavai o le aisa, i le pole i matua ma le pole i saute ma le siisii o le tai. A leitioa na o si na timu lava, lolovai Apia, ona o lea e agai pea i lalo ia laueleele o le atunuu. Ae alu ae foi i luga le tai. O le ala lena e taua tele ai a tatou gaoioiga ia e fai, o le ala foi lena e taua tele ai mea ia ua tutupu, o le faatuina i totonu o Samoa o le Faalapotopotoga e silasila totoa i le siosiomaga, aemaise foi suiga malolosi o le tau. Ae afua i se a? O lea lava ua tatou iloa mafuaaga o mafuie. I lalo ifo o laueleele ma le sami, o lo o taoto i luga o papa tetele i lalo ifo. O papa na, o papa tetele ia, atonu o le mamafa tele atu i luga, pe ono vete ai se ni papa ona see loa lea. E see le isi i lalo ae see le isi i luga, ona lulu ai loa lea o le lalolagi atoa. A fai la o lea e lavea tatou i le papa lea ua see i lalo, o lona uiga e alu alu ai pea. Ae le mafai foi ona tatou iloa, pe te i, aua o le mea lea e tupu i le tele o mafuie. E goto isi eleele ae agai i luga isi eleele. Pe te i foi ua toe agi se mafuie lulu ae i luga le isi vaega, ae pau i lalo le isi vaega. I le mamafatu o mea ia e tietie ai ia le lalolagi i luga o papa nei e i lalo e tietie ai eleele. O lalo ifo o papa na e i ai le afi, o le ala lena e lulu le mafuie i nisi o taimi, ae puna mai ai loa ia mauga mu. Ae fai mai le isi faifeau, o lalo i ina o lea e i ai Seoli. O lona uiga, o lea tatou te nonofo i luga ae o Seoli.

Lau Afioga i le Fofoga Fetalai, o lea au ou taua le matautia o mea ia, o lea e gafa ma le Matagaluega lenei. Ma o le mea tatou te mataituina, tatou te vaavaai pea vaavaai pea, ma mataitu le tulaga, e oo i ai tatou, ma taumafai foi e tatau ona faia i le agai atu i le lumanai.

Lau Afioga i le Fofoga Fetalai, o le...

Afioga Tafua Maluelue Tafua (Itupa i Lalo): Lau Afioga i le Fofoga Fetalai, malie lau Afioga i le Palemia, fai sau malologa, ua alofa atu

FOFOGA FETALAI: Se i ou tapa atua oe. E leaga o lea ua afio i lalo le Palemia, o le ala lena...O le a se mea o e finagalo i ai.

Afioga Tafua Maluelue Tafua: Faafetai i lau Afioga i le Fofoga Fetalai mo le avanoa. Sa le fia faalavelaveina lava le saunoaga a le Palemia. Ae e tatau ona ou faailoa atu, na ou vaai i le news analeila i le south pole, e 1,200 kilomita faatafafa le tele o le aisa la ua vete, tulou. ua brack, le gata i lea ae ua...mea foi lea o le a ta le 10:00, ua popole lava lou loto i le saunoaga a le Palemia, o Seoli lea e i lalo, o lea e i ai le afi. O lea la o le a le lelei sau moe nanei na o lou miti ia Seoli, pe i ai se saienitisi e faamalamalama mai lea mea moni pe leai. E sao o la e i ai le afi, ae ou te le iloa po o Seoli ma le faaaloalo.

FOFOGA FETALAI: Ia, masalo...

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: O le tagata lava ia e faatuatua, e na te iloa le alu i lalo ae alu i luga.

Ia lau Afioga i le Fofoga Fetalai, o le itu e taua, o le tele o mafuie nei e tutupu i totonu o le vanu tele lea e sau mai lava i Toga e muta pe 200 maila le mamao i gatai atu o le tatou atu Aleipata, sau ai i i Lepa. O lona uiga, o le mafuaaga lena na toatele ai nai tagata foi ia na maliliu, i lo ta itumalo, ona o i i vanu tele lea e taoto ai, ia le tele o mafuie ia i le mea o le fesoloai, fesoloai o papa tetele ia e tietie ai ia le mamafa o mea ia e i luga ae.

Lau Afioga i le Fofoga Fetalai, ona ou oo mai ai lea i le PSC. O le Matagaluega o le vaega tonu lea o Matagaluega ia ou te vaaia. O le Komisi lea e vaaia galuega a lo tatou Malo. Ia ma o le galuega lava ia a le Komisi ua tatou iloa o le vaai o le aufaigaluega, i le faa-faigaluegaina ma le faamutaina, ia ma e tele lava le galuega lea e feagai ma latou.

Peitai ina ua tulai mai ia le Faigamalo lenei, i le Nofoaiga lea i le 1982 i le 1985, na matou faatalanoa ai le tulaga o le toe iloilo o le PSC, o le ki ma le tatala atoa o tagata faigaluega. Ma ua tatau ona tilotilo lelei i tulaga o aiaiga o tagata faigaluega, na i ai mai lava i le Tutoatasi. Ia ou te manatua le matou fonotaga sa fai, faatu ai lea o nisi manatu na avea ma matou iugafono, ae tasi lava le Minisita ma faatuiese ai, fai mai lana tala e faamau lona le lagolagoina i totonu o minute o le matou fonu. Ona saunoa loa lea o le Taitai ma faapea i lalo o aga faa-Kapeneta i totonu o Faigamalo Faa-taupulega, e leai se na mea o le auese ai i totonu o le fonu a le Kapeneta, e tasi lava le leo, tasi le iuga e fai.

Ia ona faapea loa lea o Tofilau, afai e te le auai, aumai nei lava lau faamavaega. Ia ona toe sui ai lea o le iuga a le Minisita lea ma lagolagoina loa. E i ai foi itu taua sa na ia aumaia. O le tausaga 1990-1991, na faia loa ma le iuga o le a faa-konekarate uma lava ia Ofisa Sili o Pulega o Matagaluega ma o le a aiaia, o le a faasalalau uma lava ia o

latou tulaga, ma e apply. O lea la na amata mai loa ia faiga ia faakonekarate ona o le talitonuga ua toatele le aufaigaluega.

Sa lelei le faiga na sau ai, o isi e tuutuu loloa se i oo lava ina litaea. Ia aga foi ia masani o le alofa ma le feavatai. Ae manatu loa le Kapeneta i le 1990-1991, leai ua tatau ona faataoto loa se faiga fou, ua toatele tamafanau a le atunuu ua foi mai ma faailoga. Ma ua tatau ona tuu le avanoa, e talosaga ai. Ia ma filifili ai e se panel. O le 1991 la, lea na faataoto mai ai le faakonekarateina e tai 2 tausaga. Sau lea, sau sau 3 tausaga. O lea la e alu ai nei. E taua tele le faiga lea, ona o le faatauvaina o tofiga. E tusa lava po o le a lou lelei, ae a oo loa ina uma lau konekarate ae faasalalau, ia fai le panel, ona fai lea o le faatalanoaga, ia ma fai loa points ma aumai i luma o le Kapeneta, e tusa ma le 99% o fautuaga e aumai ma talia e le Kapeneta, seivagana le % lena e 1, ona e i ai nisi o mafuaaga e silafia e le Kapeneta, 33 ae e le o silafia e le panel, e na o le toa-3.

E ma o uiga lava faapea lau Afioga Fofoga Fetalai, e pei ona ou talanoa ai foi, mea nei o faaiuga e fai toatele, e sili atu le amiotonu ma sao faaiuga e fai e le toatele nai lo se faaiuga e fai e se toatasi. Ma e tasi lena taiala lelei tele o lo o mulimuli ai le Kapeneta lenei. O lo o fai nei se iloiloga o le toe fetuunaiga, o le toe review o tulaga o le role, tiute o le PSC. O le taofia o le Kapeneta o lo o i ai, ia alu atoa le taimi o le PSC, i le tulaga o le aoaoina training, o le tagata faigaluega, mai lava ia Ianuari e tau ia Tesema, e na o le train lava, train ia faateteleina le potu masani, o tagata faigaluega, ina ia mafai ona tele se faaleleia atili o galuega fai.

I totonu o le PSC, o lo o i ai foi ia le tatou Tribunal, o le Tribunal lenei, o le itutino faapitoa e faataoto mai ia tatou tulaga o totogi. Ma e talu ona tulai mai ia le Tribunal lenei, ua faataga tasi uma loa totogi uma. O tua atu sa eseese totogi o isi. O le manatu lava o le Kapeneta, e i ai se mea o le a tuu eseese ai. Ia tasi lava le faatulagaga, e le mafai ona tulai mai ai ia ni feeseeseaiga ma faia ai ni savali tetee.

Lau Afioga i le Fofoga Fetalai, o le 4 lena o Matagaluega. O le 5 o Matagaluega o le Matagaluega o le Fuimu. Ia ma ua maioio foi ia galuega a le Fuimu e pei o mu ma e lelei ia latou meafaigaluega. E tele taimi e o atu ai taavale ae o atu e leai ni vai. Ia o nai mea e faigofie. O la foi e tele mea foi ia o mea e tape mu, ua leva ona ou faatonuina e omai e fai ma test mea ia, a tupu mai se mu ae tago atu se CEO ae o la e iloa faaaoga. E tasi na mea e tatau ona fai. Ia mataala i mea faapenei, ia ma o le galuega lena a le aufuimu ua outou silafia lava.

Matagaluega a le Palemia, O le 6 lena o Matagaluega tetele lea e i lalo o lau vaavaaiga. E aofia ai ia le Immigration. O le vaega lea tau femalagaiga, ma tusifolau, o tagata e nofomau. Ma mataupu uma lava e tau sitiseni, i totonu o le tatou atunuu. E tapenaia foi e le Matagaluega a le Palemia. O fonotaga uma lava a le Kapeneta ma le tulituliloa o faiuaga fai, Matagaluega ina ia mafai ona faatino. E taua tele le itu lea o le faatino, e mafai ona alu atu, alu atu, alu atu e leai se mea o faia. O lona

uiga e tasi lea mea e agai i ai le Ofisa Sili o Pulega o Matagaluega, tuliloa mataupu e faatatau i faiuga ua uma ona fai.

O le fatu lenei o le Malo, e mafai ona ou faapea atu o le fatu lenei o le Malo, e mafai ona toai i ai mataupu uma, i le vaai a au ma le Kapeneta atoa, i le taimi e fono ai, ia faapea foi ma le tapenaina o fonotaga ma le vaaiga o le Ofisa o le Ao o lo tatou Malo, e fai ma sui tofia ina ia sologa lelei ia fesootaiga, fesootaiga tatau i le faamalosiau ma agafesootai, agafesootai lelei uma lava, mo tagata o le tatou atunuu i le lalolagi, lea e faalupe o le diaspora, ina ia i ai le lagona, o lo o amanaia e lo tatou Malo ma tagata uma o Samoa a latou matatia maoae, ua ausia i atunuu, o lo o aumau ai. Ma avea ai latou ma sitiseni o na atunuu. O se taumafaiga ia faatumau ai ia lo latou loto atunuu, atonu e manatua atili ai foi e latou aiga o lo o taputapu ai atu i Samoa nei i taimi o mafatiaga o puapuaga.

E toatele lava aiga ua i fafo, ua motusia mafutaga ma aiga i Samoa nei. E pei o le toatele foi o nisi o pagota toe faafoi mai i Amerika i Faleolo, e leai ma se aiga o iloa. E le iloa foi faa-Samoa. E le iloa foi mea na alu atu ai o latou matua. O le mea la e taua ai le division lenei, o lo o fesootai ai, i so o se tulaga e piki mai ai i totonu o faasalalauga mai i fafo, ona faafesootai loa lea i ai e logo e latou, logo latou o lea ua i totonu o le tatou lisi. Ave i ai faamanuiaga, ave i ai ia latou Christmas cards, ave i ai ni nai faamatalaga o lea ua i ai ia le tatou Malo.

E tusi mai foi latou, i le agaga faagaetia, o lo o manatu latou e lo tatou Malo. O i foi e faagaioi ai ia le tatou savali, mo faasalalauga tau i le Malo. Sa i ai le agaga e faamatuu atu i tua le Savali ae te i ane ua toe faafoi mai ma o se iuga taua tele le toe faafoi mai, o le... leai e le o le Savali, o le 2AP lea ou te talanoa atu ai. Toe foi mai i totonu o le Malo, ae o le Savali foi o le pepa lea e faalauiloa atili ai, ia faiga faavae a lo tatou Malo.

O lo o ou Taitaifono foi i le Komiti a le Atinae, faapea le Fono o Faalavelave Tutupu Faafuasei. O le fono e uunaia ai suiga tetele, faatekonolosi, lea sa saunua i ai le Minisita o Faatekonolosi, o se tulaga taua tele lea i le tapenaina o le tatou ID pepa lea o faamatalaga i lou soifua ma le aoga, i tulaga o aoga, penisione, palota ma sefe ai tupe alu i le eseese o ID.

O le mafaufauga o lo o i tua o ia fuafuaga, a ou taitaia ma ou tau tulimoe ai pea, ae pei e faalogo mai ia sui, ona o au lea e Taitaifono, a ou tulitulimoe ai lava ma ou le iloa se mea, ae a fai loa le iuga ona latou iloa lea, e le mafai ona ou tuulafoaia, lou tulituliloa po o ua fai mea ia sa matou faitonu i ai, e vave ona usitai Matagaluega ma fai mea ia, e totogo ae e pei o ni mutia e tutupu ina ua faatoa pau ifo timuga, ina ua tuanai tau o mugala.

Pe a matau, ua 6 vaiaso o le tatou Fono o faagasolo pea, ina ia manino mataupu uma, mo le silafia e le atunuu, ma soloia ai ia tuuaiga le faavae o lo o fai nei e alu atu i luga o faasalalauga. A o le itu taua lau Afioga i le Fofoga Fetalai, o le faafogafoga mai a le atunuu e leai se mea o taofia, e leai se mea o nana, e faaali uma mea uma mo le silafia.

PISINISI, ALAMANUIA MA LEIPA	\$63,798.
<i>Faamaonia.</i>	
AOGA, TAALOGA MA AGANUU	\$2,784,092.
<i>Faamaonia.</i>	
TUPE	\$13,337,461.
<i>Faamaonia.</i>	
SOIFUA MALOLOINA	\$3,000,000.
<i>Faamaonia.</i>	
FAAMASINOGA MA PULEGA TAU FAAMASINOGA	\$382,333.
<i>Faamaonia.</i>	
KOMESINA O SULUFAIGA	\$56,291.
<i>Faamaonia.</i>	
KOMISI O LE AUFAIGALUEGA A LE MALO:	\$71,468.
<i>Faamaonia.</i>	
LEOLEO:	\$2,722,264.
<i>Faamaonia.</i>	

PALEMIA: \$110,248.

Faamaonia.

GALUEGA TAU ALAMANUIA MA ATINAE A LE MALO: \$51,700.

FOFOGA FETALAI: Ia se i tulai mai le sui usufono mo Faleata lau Afioga Lealailepule.

Tofa LEALAILEPULE RIMONI AIAFI: Lau Afioga i le Fofoga Fetalai, ia se i tau malolo foi lau Afioga. Leai ou te fesili atu i le tupe lea lau Afioga i le Taitaifono o le Komiti o Tupe, o lea ou te vaai atu o se tagata faapitoa, technical advisor e vaai mea ia o aoga i a tuu atu i tua, privatize. O lau fesili lau Afioga, e leai lava se isi i totonu o lenei Matagaluega e mafai ona faia lenei galuega faigofie? Ma lou faaaloalo lava.

FOFOGA FETALAI: Ia, se i tulai mai le Taitaifono o le Komiti o Tupe.

Afioga ALIIMALEMANU ALOFA TUUAU: O lea ou te fia fesili i le sui usufono po o fea le Matagaluega lea e fesili mai ai ona o lea ua tatou oo i le Matagaluega o le Ofisa o le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga o lea ou te tau fai atu e faagasolo le galuega. O le mea lena e tataua ona fesili ifo le Sui Minisita i lana Minisita e faamalamalama atu.

Tofa LEALAILEPULE RIMONI AIAFI: Ua malamalama faafetai.

Afioga Hon AFAMASAGA LEPUIAI RICO TUPAI: O le technical advisor lava a tatou lau Afioga. Pei o le tali faigofie lena.

FOFOGA FETALAI: Se i fai alii ma... se aua le ma le Minisita Lagolago e fesili i le Minisita.

Faamaonia le \$51,700 mo Galuega Tau Alamanuia ma Atinae a le Malo.

GALUEGA, FELAUAIGA MA ATINAE ESEESE: \$4,084,247.

Faamaonia.

PULEGA O FELAUAIGA I LE LAUELEELE: \$5,847,647.

Faamaonia.

IUNIVESITE AOA O SAMOA: \$1,751,492.

Faamaonia.

**FAALAPOTOPOTOGA O SUESUEGA \$680,797.
FAASAIENISI A SAMOA:**

Faamaonia.

PULEGA O MALAE MA FALE TAALO A SAMOA: \$103,910.

Faamaonia.

**AOFAI FAAOPOPO I TUPE ALU \$35,874,743.
AOAO 2020/2021**

Faamaonia.

FAAMATALAGA LONA LUA

FAAITIITIGA I TUPE FAATATAUINA

**MATAGALUEGA FAAMATALAGA AOFAI TUPE
FAAITIITIA**

FAATOAGA MA FAIGAFIIVA: \$(1,542,121).

Faamaonia.

PISINISI, ALAMANUIA MA LEIPA: \$(153,065).

Faamaonia.

FESOOTAIGA: \$(91,362).

Faamaonia.

AOGA, TAALOGA MA AGANUU: \$(187,954).

Faamaonia.

TUPE: \$(539,988).

Faamaonia.

MATAUPU TAU LE VA I FAFO: \$(744,532).

Faamaonia.

SOIFUA MALOLOINA: \$(332,357).

Faamaonia.

**FAAMASINOGA MA PULEGA
TAU FAAMASINOGA: \$(327,960).**

Faamaonia.

**PUNAOA FAALENATURA MA LE
SIOSIOMAGA: \$(259,970).**

Faamaonia.

LEOLEO: \$(79,150).

Faamaonia.

FALEPUIPUI MA LE TOEFUATAINA: \$(58,714).

Faamaonia.

PALEMIA: \$(417,039).

Faamaonia.

**GALUEGA TAU ALAMANUIA
MA ATINAE A LE MALO: \$(83,148).**

Faamaonia.

TIUTE MA TUPE MAUA: \$(261,050).

Faamaonia.

**TINA MA TAMAITAI, ATINAE \$(138,024).
O NUU MA AFIOAGA MA
AGAFESOOTAI:**

Faamaonia.

**GALUEGA, FELAUAIGA MA \$(92,369).
ATINAE ESEESE:**

Faamaonia.

FUAINUMERA FAAMAUINA: \$(36,653).

Faamaonia.

PULE MA SUETUSI SILI: \$(199,642).

Faamaonia.

**KOMISI O LE TOEFUATAIGA \$(12,351).
O TULAFONO A SAMOA**

Faamaonia.

**OFISA O LE FONO AOA O
FAITULAFONO** **\$(200,000).**

Faamaonia.

KOMESINA O SULUFAIGA: **\$(22,080).**

Faamaonia.

**KOMISI O LE AUFALUEGA
A LE MALO:** **\$(89,574).**

Faamaonia.

**PULEGA O FELAUAGA I
LE LAUELEELE:** **\$(996,615).**

Faamaonia.

**AOFAIGA FAITITIAGA AOA O
I TUPE ALU 2020/2021** **\$(6,865,718).**

Faamaonia.

FAAMATALAGA:

Faamaonia.

FUAIUPU 2: Faamatuu atu ma le Faatatauina o le \$35,874,743 mai le Faaputugatupe a le Matagaluega o Tupe.

Faamaonia.

FUAIUPU 3: Faaititiga o aofaiga na uluai faatatauina ma toe faasoaso atu i isi galuega faatino ma galuega faatino laiti.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Faatatauina o Tupe Faaopoopo (Nu.1) 2020/2021.

Faamaonia.

Na faagasolo le Tulafono Tau Faaofi o le Faatatauina o Tupe Faaopoopo (Nu.1) 2020/2021 e aunoa ma se Teuteuga.

**TULAFONO TAU FAAOFI O LE FAATATAUINA O TUPE
FAAOPOOPO (NU 1) 2020/2021 - faitauga faatolu**

FOFOGA FETALAI: Ma lou faaaloalo ou te tapa lau Afioga i le Minisita o Tupe.

Afioga Hon SILI EPA TUIOTI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu 1) 2020/2021 i lona faitauga faatolu.*

Faaluaina e le Minisita o Tupe Maua ma Tupe Totogi, ma le Minisita o Aoga, Taaloga ma Aganuu.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.

Na faaalua le agaga fiafia o le Maota i le patipati o latou aao ina ua pasia le Tulafono Tau Faaofi o le Faatatauina o Tupe Faaopoopo (Nu 1) 2020/2021.

FOFOGA FETALAI: Ua ou manatu ua lava foi lea galuega, ua faaaaogagase foi a outou afioga. Aemaise foi o le au matutua le Palemia, ma le Kapeneta faapea foi Minisita Lagolago ma lea itu o le Maota i Taitaifono, le paia o tupu ma ee o le atunuu. E fai mai sui aua lea itu o le Maota. E faapea foi le paia maualuga i le mamalu o le augalulue, Ofisa Sili o Pulega o Matagaluega ma Faalapotopotoga tumaoti a le Malo, aemaise foi o i latou o galulue e faatino foi le tulaga o fesootaiga ma faamatalaga televavave i nei ona po. Ua faapena ona tatou tua i ai i le taimi faigata ma le taimi tatou te feagai ai ma le matautia o faamai eseese ma le tulaga o le louloua o le tau. E i ai le manatu, ua lava lea galuega mo lenei aso, taeao aena, faapena ona faamaea nisi o galuega o totoe mo le tatou foi taimi lenei o le tatou Paeaiga.

Tapa le sui usufono mo Falealii Sisifo na te faaiuina le tatou Fonotaga i se tatalo.

Na tolopo Taulumaga o le Fono Aoa Faitulafono i le itula e 10:33 i le po, seia aulia le itula e 9:00 i le taeao o le Aso Lua, 02 Mati 2021.